


19-3

蜀中名勝記卷之六


成都府六

灌縣

成都記云江本出岷將山北連甘松至於灌口永康軍志漢文翁為守穿湔江水堰流以灌平陸春耕之際需之如金號曰金灌口也李膺益州記曰湔水路西七里灌口山古所謂天彭關也華陽國志望市之時有石水災其相繼期決溢壅以除水害遂委以政事曰而禪位於開明之西山靈焉按今灌口鎮在



土岐文庫
文庫17
W216
3



文庫 17
W216
3



蜀中名勝記卷之六

閩中曹學佺能始著

成都府六

灌縣

成都記云江水出羊膊山北連甘松至於灌口永康軍志漢文翁爲守穿湔江水堰流以灌平陸春耕之際需之如金號曰金灌口也 李膺益州記曰湔水路西七里灌口山古所謂天彭闕也華陽國志望帝之時會有水災其相開明決玉壘以除水害遂委以政事已而禪位於開明之西山隱焉按今灌口鎮有

昭和六十年二月一日贈
朱文堂古唐氏寄

010185186089

望帝祠存 道將又云秦李永爲蜀守知天文地理謂汶山爲天彭門乃至湔壩江見兩山相對如闕彷彿若有神見遂於水上立祠三所祭用三牲珪璧沈瓚漢興數使使者祭之按揚雄蜀記李永以亡者過天彭關精靈數見焉 元和志灌口鎮在導江縣西二十六里後魏置自灌口坂迄千頃山五百里間兩崖壁立有瀑布飛流十里而九昔人以爲井陘之阨寰宇記云唐貞觀於灌口鎮立鎮靜軍宋改爲永康軍 杜甫野望因過常少仙詩野橋齊度馬秋望轉悠哉竹覆青城合江從灌口來入村樵徑引嘗果栗

園開落盡高天日幽人未遣回岑參聞崔十二侍御灌口夜宿報恩寺詩聞君尋野寺便宿支公房谿月冷深殿江雲擁迴廊燃燈松林靜煮茗柴門香勝事不可接相思幽興長蘇軾送鮮于都曹歸蜀灌口舊居詩齋盡霜鬚照碧銅依然春雪在長松朝行犀浦催收芋夜渡繩橋看伏龍莫歎倦游無駟馬要將老健敵千鐘子雲三世惟身在爲向西南說病容 水經註曰江水又歷都安縣卽文山郡治劉備之所置也有桃關及漢武帝祠李永作大堰於此立碑六字曰深淘渾淺包隄隄者於江作壩壩有左右口謂之

蜀中名勝記 卷之六 二
湔笮江 古今集記曰李永使其子二郎作三石人以鎮湔江五石犀以厭水怪鑿離堆山以避沫水之害穿三十六江灌溉川西南數十州縣稻田自禹治水之後永能因其舊跡而疏廣之今縣西三十三里犍尾堰索橋有李永祠按卽崇德廟也宋扈仲榮仕爲監永康軍崇德廟卽此 范石湖離堆詩序云沿江兩厓中斷相傳秦李永鑿此以分江水上有伏龍觀是水鎖孽龍處蜀江水涸則遣官致祭壅都江水以自足謂之攝水民祭賽者率以羊歲殺羊四五萬計其詩云殘山狼石雙虎卧斧跡鱗皴中鑿破潭淵

油油無敢唾下有猛龍拴鉄鑱自從分流注石門西州杭稻如黃雲割羊五萬大作社春秋伐鼓蒼煙根我昔官稱勸農使年年來激西江水成都火米不論錢絲管相隨看蠶市 註水經曰江水由湔笮江入郫江檢江以行舟益州記曰江至都安堰其右檢其左其正流遂東郫江之右也因山頽水坐致竹木以溉諸郡又羊摩江灌江西於玉女房下作三石人於白沙郵郵在堰官上立水中刻要江神水竭不至足盛不沒腰是以蜀人旱則藉以爲溉雨則不遏其流故記曰水旱從人不知饑饉沃野千里世號陸海謂

之天府也俗謂都安之堰亦曰湔堰又謂之金堤左思蜀都賦云西踰金堤者也諸葛亮北征以此堰農本國之所資以征丁千二百人主護之有堰官李膺記云玉女房鑿山爲穴深數十丈中有廊廡堂室屈曲殆若神功非人力矣蜀志後主登觀坂看汶江旬日始遷成都華陽國志益州刺史皇甫晏至都安屯兵觀坂從事何旋曰今所安營地名觀坂上反在下其徵不祥不從果爲牙門張和所殺隄堰志曰粵自神禹導江正源至石紐出汶川而南其北無水秦昭襄王時蜀守李冰鑿離堆虎頭於江中設象鼻

七十餘丈首濶一丈中濶一十五丈後一十三丈指水一十二座大小釣魚護岸一百八十餘丈橫瀦洪流故曰都江以分岷江之水北折而東灌溉蜀郡田疇以億萬計蜀用富饒號稱陸海於所逼處又設護岸蓋籠石附岸水不蠹土而渠可堅久指水數十餘處如象鼻狀以扞之皆水之所作也都江口舊有石馬埋灘下凡穿洶必以離堆石記爲準號曰水則其下灘深二丈二尺而水則下亦深七八尺石渠水口橫一丈五尺從一百二十丈深六尺石洞水分爲三曰灌田水口橫一丈從一百二十丈深六尺曰彭州

水口橫三丈又分爲二其一從十有五丈深五尺其一從四十丈深三尺曰將軍橋水口橫二丈三尺從四十丈深三尺外應水口橫四丈從一百四十丈而中分之上流深六尺下流二尺保堂水口橫一丈五尺從一百三十丈深四尺倉門水口橫八尺從五十丈深二尺馬騎水口橫六丈從一百九十丈深二尺鼓兜石趾水口橫二丈五尺從六十丈深二尺東穴水口橫三尺從一百五丈深五尺投龍水口橫五丈從八十丈深三尺北水口橫四丈從一百八十丈深三尺鐵溪水口橫一丈從六十丈深三尺擗下水口

橫五丈從一百二十丈深三尺五徙水口橫三丈從六十丈深一尺歲以爲度過與不足其害立見由漢以來數千百年或因舊葺治或因時疏築而功實原於秦守水故歷代廟祀之所謂馬騎水口者東南六七里間有堤名上馬騎下馬騎各長二百餘步世傳水駐馬於此督工後訛以騎爲隄也 宋史曰沫水出蜀西徼外今陽山江大皂江皆爲沫水入西川嘉眉蜀益間夏潦洋溢必有衝決可畏之患自秦李冰鑿離堆以分其勢一派南流于成都以合岷江一派由永康至瀘州以合大江一派入東川而後西川沫

水之害減耕桑之利溥矣皂江支流迤北曰都江口
置大堰疏北流爲三曰外應溉永康之導江成都之
新繁而達於懷安之金堂東北曰三石洞溉導江與
彭之九隴崇寧濛陽而達于漢之雒東南曰馬騎溉
導江與彭之崇寧成都之郫温新都新繁成都華陽
三流而下派別支分不可悉紀其大者十有四自外
應而分曰保堂曰倉門自三石洞而分曰將軍橋曰
灌田曰雒源自馬騎而分曰石址曰鼓兜曰道溪曰
東穴曰投龍曰北曰擗下曰五徙而石渠之水則自
離堆別而東與上下馬騎乾溪合凡爲堰九曰李光

曰磨村曰百丈曰石門曰廣濟曰顏上曰弱水曰濟
曰導皆以隄攝北流注之東而防其決離堆之南實
支流故導以竹籠石爲大隄凡七壘如象鼻狀以捍
之離堆之趾舊鑿石爲水則則盈一尺至十而止水
及六則流始足用過則從侍郎堰減水漸泄而歸諸
江歲作侍郎堰必以竹爲繩自北引而南準水則第
四以爲高下之度江道既分水復湍暴沙石填委多
成灘積歲暮水落築堤壅水上流春正月役工濬治
謂之穿淘有碑刻熙寧制書云凡剗水礧碾有妨灌
溉民田者以違制論 元史曰蜀堰舊爲李永作歷

數千百年所過衝崩蕩嚙又大爲民患有司以故事
歲至隄防一百三十有二所役兵民多者萬餘人少
者千人其下猶數百人役凡七十日不及七十日雖
事治不得休息不役者日出三緡爲庸錢由是富者
屈於貲貧者屈於力上下交病會其費歲不下七萬
緡大抵出於民者什九藏於吏而利之所及不足以
償其費元統二年僉四川肅政廉訪司事吉當普巡
行周視得要害三十有二處餘悉罷之召灌州判官
張宏計曰若蝨以石歲役可罷民力可蘓宏遂出私
錢爲小堰堰成暴漲不動乃具白行省及蒙古軍七

翼之長郡縣守宰下及鄉里之老各陳利害咸以爲
便於是徵工發徒卽都江舊蹟而治之鹽井關限其
西北水西關據其西南分江導水因勢瀦堰以鐵六
千斤鑄大龜貫以鐵柱鎮其江源然後諸堰皆蝨以
石範鐵以關其中以桐油石灰雜麻絲搗熟密苴罅
漏岸善崩者築江石以護之上植楊柳旁種蔓荆櫛
比鱗次賴以爲固所至或疏舊渠以導其流或鑿新
渠以殺其勢遇水會則有石門泄蓄自是水利省臺
上其功詔揭傒斯記之是役石工金工皆七百人木
工二百五十役徒三千九百蒙古居二千糧千石有

奇石材萬餘灰六萬餘斤油半之鐵六萬五千斤麻
五千斤共四萬九千有奇緡工畢官積餘二十萬一
千八百緡責灌守以貸于民歲取其息以備祭祀淘
灘修堰之費仍免灌之兵民常役俾專力堰事焉
舊經云太初蜀王征西番野人以壺漿爲獻王使投
之江中三軍飲之皆醉因名味江寰宇記云味江水
出青城長樂山下江中有大石高數丈號大坎又有
小石在其下亦高數丈爲小坎水激其上洶湧聞于
數里古老傳云味江水甘美人爭飲之因名青城外
史云卽今漩口江也江口石有名大險小險或卽坎

之轉音大坎石磴透迤其傍深林老樹猿猴纍纍掛
樹間春夏水至則沒路矣 水經註云都安縣渡江
有窄橋按所謂索橋溜笏皆其遺制也唐獨孤及窄
橋贊曰相引一索人綴其上如猱之縛轉帖入淵如
鳶之落尋橦而上如魚之躍頃刻不戒實無底壑志
云縣西二里有橋曰珠浦卽索橋也其制兩岸墜石
爲穴攏石爲籠夾植巨木屹砥湍流編竹繩跨江橫
濶一丈離水面五尺長百二十丈方輿勝覽云繩橋
前有翠圍山山上道院古王仙柯燒丹之處在永康
縣西八里范成大過青城題索橋詩織簞勻鋪面排

繩疆架空染人高曬帛獵戶遠張置薄薄難承雨翻
翻不受風何時將蜀客東下看垂虹志云溜筩橋在
縣西六十里兩岸石柱以竹繩橫牽斲木爲筩狀似
瓦覆繫繩上渡者以麻繩縛懸筩下仰面緣繩而過
南通滋茂鄉與汶川界今易爲繩橋 古今集記云
縣西十餘里有虛閣棧道二十五里有石筩閣道三
十里龍洞閣道 碑目云距紫屏山二里許道旁有
漢石刻三皆治道記也其一曰建平五年孝哀時刻
也其二曰永平元年孝明時刻也在范公平磨崖之
西 成都記云古魚鳧國治導江縣寰宇記曰導江

縣本都安縣地太康地志云都安劉先主置屬汶山
郡周武帝併入益州之郫別於灌口置汶山縣唐武
德元年改爲盤龍縣尋改爲導江李膺記云山土色
黃盤迴有龍形故曰盤龍外史曰盤龍山不言所在
今學官之右有金龜山壤黃而形蜿蜒者是也 志
云導江廢縣在東二十里導江舖元爲巡檢司時土
城尙在今悉平爲田初孟蜀改導江爲灌州宋改永
康軍尋廢熙寧七年趙抃知成都乞復永康軍嘉定
二年知軍虞剛簡上五事曰本軍近接威茂并青城
一帶山不五七十里卽是夷界唐吐番入寇自此途

出又距成都百二十里而近其爲緊切甚于雅黎
方輿勝覽云玉壘堂致爽軒俱在軍治范至能詩夕
陽塵外漲郊墟六六峰頭夢覺餘竹色喚人來下馬
亂蟬深處有圖書陸務觀和云黃塵赤日汗沾裾竹
裏煎茶喜有餘堪笑放翁窮意巧就君池館讀君書
子焯和云團團竹色遶郊居勾引青風百畝餘憶昔
敲門蘇內翰而今下馬范中書 紀勝云廣莫亭在
軍北朝天門太守呂汲公建李壁記曰危簷飛檻負
城四出觀覽之勝甲于東南出金馬門過朝天寺登
廣莫亭憑欄下視一目千里矣又有花洲在軍城南

白步王子俊爲賦魏華父記 碑目云唐貞觀十三
年韋作觀魚碑在軍城五里北山朝天寺又云唐人
徐浩書金剛經在導江天宮院今刻之石又云導江
縣北迎祥寺鐘樓內有刻字不記年月觀其有節度
押衙字卽爲唐末五代間刻也寺有老泉爲記東坡
書碑刻俱存 志云縣西二里崇德廟李文饒鎮蜀
時重建段全暉爲記廟內有八分書聖水池碣近年
掘地得之移入成都墨池按方輿勝覽聖水池在永
康縣西一舍妙真觀觀昔有女子上昇仙洞藥爐尙
存不知碣何以在崇德廟 碑目云唐吳行魯碑在

導江縣北鬪雞臺有古碑刻字畫磨滅蓋唐大中十一年治隸彭州時吳爲長史所建又云僞蜀王建之子嘉王宗壽與能仁院僧卯往來書劄二十餘簡存于龍門院墨迹宛然如新按張商英龍門院本末記院在永康縣六里青城大面三十六峰嵯峨萬仞盡在軒檻間其詩云四時積雪瞻岷嶺三派飛泉出洞天卽此地 寰宇記云司馬相如墓在導江縣東十里又有楊妃池今爲唐氏之居按太真外傳楊元琰爲蜀州司戶生貴妃於此妃兒時嘗誤墮此池志云在縣東二十里今爲丘洪二姓宅 陳後山云王蜀

花蕊夫人姓費氏青城人也圖經相傳有花蕊舊宅不知其處費氏尙有裔存詳見詩話 方輿勝覽云蠶崖關在導江縣五十里以振西山之走集外史云關去縣二十里寔汶川地有巨石高丈餘峙山之麓土人云此蠶崖石也關以此得名志云關當縣西岷江之北松茂驛路之衝周武天和二年敕立石路巉稜如簇蠶因名杜少陵詩蠶叢鐵馬瘦灌口米船稀卽此宋熙寧五年重建元末燬于兵火今置巡司關外有市謂之蠶崖市宋史韓忠憲公子紺繼知成都日所遷以爲夏夷互易之地蓋施西羌窺伺之端云

金部格曰勅松當悉維翼等州熟羌每年十月已後
卽來彭州互市法司差上佐一人於蠶崖關外依市
法至市場交易勿令百姓與往還 志云玉壘山去
縣三百里眾峰叢擁遠望無形惟雲表崔嵬稍露山
石瑩潔可爲器亦砮砮之類唐貞觀初關於其下名
玉壘關亦曰七盤關乃番夷往來之衝也 碑目云
玉壘關碑唐大中十年白敏中帥蜀日建關旁有大
碑卽幕府陳可度頌功德之碑岑參酬崔十三侍御
登玉壘山思故園見寄詩玉壘天晴望諸峰盡覺低
故園江樹北斜日嶺雲西曠野看人小長空共鳥齊

高山徒仰止不得日攀躋崔信明送金敬陵入蜀詩
金門去蜀道玉壘望長安豈言千里足方尋九折難
西上君飛蓋東歸我挂冠猿聲出峽斷月影落江寒
從今與君別花月幾新殘 李膺益州記云齊永明
初置齊基縣於青城山東築土城週五里周地圖記
云武帝改齊基爲青城縣因山名也志云廢青城在
今縣西四十里散入大樂其亭二鄉 名山記曰益
州西南青城山一名青城都山形似城其上有崖舍
赤壁張天師所治處南連峨眉亦有洞天諸靈書所
藏不知當是第幾洞天也 玉匱經曰青城山爲第

五大洞寶仙九室之天一名赤城山對蜀郡之西北在岷山之南杜光庭記云岷山連峰接岫千里不絕青城乃其第一峰耳高三千六百丈周匝五千里靈仙所宅祥異甚多於是有瑤林瓊樹金沙玉田甘露芝草天池醴泉之異焉福地記中國名山以青城峨眉爲西嶽佐理又三佐命山及十大洞天皆有青城之名 楊用修蜀志補罅云青城山有一百八景風日佳時登儲福宮望之歷歷可數曰彭祖峯曰石鑑峰曰龍牙峰曰野雲溪曰藏雲塢曰齊雲榭曰垂虹亭曰捎雲閣曰觸石軒曰卧雲庵曰青溪曰碧桃溪

曰芙蓉溪曰躑躅溪曰海棠溪曰溪光亭曰過溪橋曰乳泉曰滴珠泉曰檻泉曰清風湖曰鑑湖曰荻花洲曰蓼嶼曰碧霞洞曰斜川曰曲水曰紫霞洞曰檻橋曰藥圃曰紫薇洞曰醪醑洞曰清陰橋曰綠篠橋曰玉微亭曰紅霞塢曰爛柯亭曰灌稻泉曰翠光亭曰茅堂曰紫陽洞曰桃源曰暗香亭曰金華堂曰舸齋曰蕙谷曰黃梅嶺曰煎茶溪曰芹浦曰鸚鵡林曰葦廬曰野人澗曰栢坪曰寶遂社曰玅高峰曰娑羅坪曰木蘭岫曰桂香亭曰石寶曰白蘋洲曰藻壑曰望岷岬曰豹谷曰百花潭曰鹿關曰瑞香嶺曰芝畦

曰瑞荷塘曰蒹葭渚曰黃浦曰菱灣曰芭蕉谷曰直
鈞亭曰和芳隴曰金根徑曰橘徑曰鑑雉泓曰芙蓉
島曰歲寒洞曰葦杭曰棲真洞曰望仙坡曰黃葵坡
曰鳳簫樓曰跨鳳亭曰牛關曰馭鶴峰曰化城洞曰
望闕臺曰凝碧溪曰玉女潭曰寶陀岩曰蓴坡曰藏
春島曰桂子谷曰九曲池曰華海曰江梅島曰水仙
匯曰蒼蘆崗曰丹臺曰浴丹池曰瀑藥臺曰芳草渡
曰采薇汀曰金絲堤曰菖蒲谷曰種茶岩凡一百有
八也 唐耿漳送崔明府赴青城縣詩清冬賓御出
蜀道翠微間遠霧開羣壑初陽照近關霜潭浮紫菜

雪棧繞青山當似遺民去柴桑政自閒錢起賦得青
城山送楊杜二郎中赴蜀軍歌蜀山西南千萬重仙
經最說青城峰青城嶽岑倚空碧遠壓峨眉吞劍壁
錦屏雲起易成霞玉洞花明不知夕星臺二妙逐王
師阮瑀軍書王粲詩日落猿聲連玉笛晴來山翠傍
旌旗綠蘿春月營門近知君對酒遙相思岑參寄青
城龍谿僊道人詩五嶽之丈人西望青蒼雲開露
崖崙百里見石稜龍谿盤中峰上有蓮花僧絕頂小
蘭若四時嵐氣凝身同雲虛無心與谿清澄誦戒龍
每聽賦詩人則稱杉風吹袈裟石壁懸孤燈久欲謝

微祿誓將歸大乘願聞開士說庶以心相應崔塗寄
青城山顯禪師詩懷師不可攀師住杳冥間林下誰
聞法塵中只見山終年人不到盡日鳥空還曾聽無
生說應憐獨未閒賈島送靈應上人詩遍參尊宿遊
方久名嶽奇峰問此公五月半間看瀑布青城山裏
白雲中宋紫微孫處士送青城丈人詩深羨青城好
洞天白龍一覺幾千年鋪雲枕石長松下朝退看書
盡日眠趙抃入蜀先寄青城張遨先生詩踰年青社
得徘徊一日皇華下詔催蜀道五千馳驛去秦關百
二拂雲開不同參政初時入也似尙書兩度來到日

先生應笑我白頭猶自走塵埃又遊青城詩三十六
峰峻維岷在蜀奇方行刺史部重欵丈人祠凍雪諸
番隔晴雲大面披訪仙窮寶洞勅鬼覘豐碑泉落寒
崖響蘿依古木垂良工存舊筆老叟琢新詩陟險齊
雙屐逢幽鼓七絲盤桓不忍去還作更來期范成大
青城山詩萬里清遊不厭慵雙旌換得一枝筇來從
井絡直西路上到江源第一峰海內閒身輸我佚山
中佳氣爲人濃題詩試刻巖前石付與他年蘚暈重
李膺記云入山七里至赤石城有羊馬臺三師壇
上五里至瀑布水澗二百步有二石梯有一石笋高

三丈過二石門絕崖數百丈下起常道觀高峰下有
水六時灑落東北有二石室名龍宮可容百餘人從
龍宮過石室至石梯名龍橋又有一石梯洞穴深邃
莫知所極西北有石室宛然見存又有黃帝壇石法
天地上圓下方濶一丈二尺有十二角觀東石刻日
月各濶五尺厚一尺二寸相對柱上烏兔輝燦方圓
磅礴可觀 五岳真形圖云洞天所在之處其下別
有日月分精以照其中龍橋處二山相去百餘步峯
巒危竦相對橋在峯首橋之半漸漸促小可六七寸
長一丈五尺兩邊懸崖俯臨不測山傍有誓石天師

張道陵與鬼兵爲誓朱筆畫山青崖中絕今驗斷處
石並丹色濶二十丈深六七丈望之赭然也 青城
甲記黃帝封青城山爲五嶽丈人乃嶽瀆之上司眞
仙之崇秩一月之內羣嶽再朝焉續博物志青城縣
歲春秋以蔬饌享丈人山令躬行禮蓋蜀之望山也
有丈人觀在青城百二十里碑目云丈人觀四碑大
殿右功德碑鄭敖書殿上祝文碣進士任礪撰三門
下置觀碑徐大亨撰三門右紀符瑞碣甘遺榮八分
書杜甫詩云自爲青城客不唾青城地爲愛丈人山
丹梯近幽意丈人祠西佳氣濃綠雲擬住最高峯掃

除白髮黃精在君看他時冰雪容李真六言詩春凍
曉羈露重夜寒幽枕雲生豈是與山無素丈人看帽
相迎真蓋唐末仙人也陸游謁丈人觀詩黃金篆書
榜朱明夾道巨竹屯蒼雲岩巔劃若天地分千柱耽
耽歷其根纓冠笑謁丈人君廣殿空庭吹寶薰摩挲
畫牆手爲皸異哉山夔與土獷物怪齷齪冠丘墳僊
人佩玉雜帨盼手整貂冠最不羣欲去不忍恨日曛
道翁採藥晝夜勤松根茯苓獲兼斤人芝植立強骨
觔狗杞羣吠聲狺狺山爐小甌炊幽芬朱顏不飲常
自醺我亦宿誦五千文一念之差墮世紛逝將從翁

走如麴隱書秘訣何由聞又題丈人觀道院詩斷雲
浮月磬聲殘木影如龍布石盤偶駕青鸞塵世窄閒
吹玉笛洞天寒奇香滿院晨炊藥異氣穿巘夜浴丹
却笑飛仙未忘俗金貂猶帶侍中冠按務觀二作多
詠范長生事其劍南詩藁云青城山有孫太古畫碧
落侍中范長生舉手整貂蟬像特妙其詩又有浮世
升沈何足計丹成碧落珥貂蟬之句 方輿勝覽云
碧落觀卽長生觀在青城山北二十里昔有范寂字
無爲劉先主時棲止青城山中以修煉爲事先主徵
之不起就封爲逍遙公得長生久視之道劉禪易其

宅爲長生觀觀有古栴高數十尋圍三十尺世傳長
生手植胡叔豹詩更廡盤根藏大藥也令嘉樹得長
生卽此觀有赤城閣臨眺甚遠外史云唐明皇登青
城於長生觀駐輦故志謂長生是玄宗別殿雖就傾
圯遺砌儼然唐求長生觀詩數里緣山不厭難爲尋
真訣問黃冠苔鋪翠點仙橋滑松織香梢古道寒晝
傍綠畦嫋嫩玉夜開紅竈燃新丹鐘聲已斷泉聲在
風動茅花月滿壇 乙記云上清宮上皇殿延慶宮
皆明皇幸蜀時造吳船錄云上清宮在最高峰之頂
以板閣挿石作堂殿下視丈人峰直牆堵耳岷山數

百峰悉在欄檻下如翠浪起伏勢皆東傾孫知微詩
臺殿壓平青嶂頂松杉插破白雲根者此也勝覽云
晉起朝天宮於高臺山丈人祠側號曰上清宮其東
北麓卽天師種粟之處上有天池夜則神燈飛行遍
空或謂草木之精所爲王叔瞻詩神燈點點光可燭
星斗熒熒低欲捫卽此宮庭又出瑞聖花見方物記
晉時又於丈人峰前建上皇觀蜀志補罅云亦名
玄真觀神芝異草嘉樹名花皆生於此芝草如稻苗
食之可仙唐章孝標上皇觀詩煙霞華蓋七星壇想
像先朝駐禁鑾輦路已平栽藥地皇風猶在步虛壇

樓臺蜃氣晴蕭索杉檜龍身老屈蟠翻感惠休并本
郭劍門空處望長安 延慶宮卽常道觀也勝覽云
自會慶宮西行一二里有常道觀乃古黃帝祠址隋
建甲記云大業七年太常博士陰道碑在常道觀軒
轅石龕下軒轅臺獨秀霞表下望衆山若蟻垤連抱
之樹若薺志云石龕今呼天師洞有張天師像及唐
碑字畫完好可搨碑文曰勅益州長史張敬忠頃者
西南阻化徭役殷繁山川旣接於夷戎縣道有勞於
轉輸自卿鎮撫百姓咸安革弊遷訛良多慰沃歲陰
寒極比安好今賜卿衣一副至領之蜀州青城先有

常道觀其觀所置元在青城山中聞有飛赴寺僧奪
以爲寺州旣在卿節度檢校勿令相侵觀還道家寺
依山外舊所使道僧兩所各有區分今使內品官王
懷景道士王仙卿往蜀川等州故此遣書指不多及
右勅明皇行書開元十二年歲次甲子閏十二月十
五日下午十三年正月一日至益州二日至蜀州專檢
校移寺官節度使判官彭州司倉參軍楊壽蜀州刺
史平嗣先青城縣令沈從簡常道觀主白遺榮勒字
右款八分書碑目云延慶移觀手詔碑在觀後絕峰
之上石龕中韓擇木八分書記銘在延慶靈寶真人

五符神幢下開元十二年立志云延慶觀亦名昭慶
文與可昭慶觀詩琳崖盤玉霄彩翠接步武雲霞不
可畫泉石固難譜神幢逾百尋帝轍歷萬古靈瀑誰
與窮長飛六時雨所謂神幢卽五符幢也 碑目唐
玄宗眞容碑在六時岩下按志明皇像亦在天師洞
或以爲孟昶像也錄異記云六時水在宗玄觀南二
里對觀有峭厓高五百餘尺厓上授道垓昔甯眞君
與軒轅帝傳道之所每日六時有自然水從厓上灑
入澗底有石龕刻玄宗皇帝御容勝覽云常道觀南
有六時水云六時灑水以代晷漏陰時卽飄然而灑

陽時則無呂汲公詩巖輝萬古照泉漏六時飛京鏗
詩八千里隔東西境十二時分晝夜泉卽此又有石
日月日在延慶觀東北月在溪西崖中並徑五尺六
寸半一曰石天地天形有十二角地形正方濶六七
尺或云卽誓鬼壇也 方輿云鬼城山在丈人觀西
北又云常道觀北有張天師誓鬼壇志云漢時龍穴
出水暴害禾稼張道陵立石臺以鎮之名誓鬼臺甲
記曰壬子七月十三日鬼城山崩瀑水大至山高百
餘丈丈人觀居其下將憂摧壞俄有大石墜下堰水
向東竟免漂陷初觀中資溪水日用負汲爲勞自瀑

水之後流泉直注廚下甘美不竭碑目云昔天師自鬼城山驅鬼於絕域有鬼界古碑字畫磨滅不知年代又云天師戒鬼筆迹在大龍橋側深一十三丈濶十三丈輿地紀勝云清都觀在延慶上二三里一名洞天觀唐道士薛昌浴丹井杜光庭墓俱在觀後薛昌卽飲昌陸酒得道者文潞公鎮蜀日市觀側隙地以贈張俞所謂白雲隱居也其下白雲溪出焉任宗易詩懶隨六詔上丹闕高卧一峯藏白雲少愚自題云欲作外臣誰是友白雲孤鶴在岩扉杜廣成曰延慶觀南天倉山神仙以爲帑庫有三十六峰前

十八曰陽峰後十八曰陰峰河圖括地象白沙一百八景青城三十六峰謂此也晁公邁詩天峰夜半剪氷花三十六峰如玉立趙雄詩三十六峰如不到青城還似不曾遊勝覽云天倉下儲福宮有唐睿宗女玉眞公主像宮有天峰閣望三十六峰如列屏沈少南詩割盡齊封奉魯元更開沁水占名園何如帝子空山外落日騎驢芳草原胡叔豹詩棄形如遺但養神阿兄爛醉梨園春人百撼之耳不聞何物女子乃獨醒徑來空山卧白雲不見漁陽胡馬塵文同天倉山威儀觀詩羣峰削瓊瑤老蘇抹古綠應朝大岷

去簪笏儼相逐珠宮秘仙仗錦笈藏寶籙上帝此爲
倉其田堪種玉 蜀檮杌咸康元年九月王衍與其
母太后太如同禱青城宮人畢從皆衣雲霞之衣衍
自製甘州詞令宮人歌之住山中旬日設醮祈福太
后太妃又謁王先生鑄像已幸丈人玄都二觀及金
華宮夫人李舜絃隨駕詩曰因隨八馬上仙山頓隔
埃塵物象間只恐西追王母宴却憂難得到人間
志云金華在丹景玉華在青城陸游青城山夜登玉
華樓木蘭花慢詞云閣邯鄲夢境歎綠鬢早霜侵柰
華岳燒丹青谿看鶴尙負初心年來向濁世裏悟真

詮秘訣絕幽深養就金芝九畹種成琪樹千林星壇
夜學步虛吟露冷透瑤簪對翠鳳披雲青鸞遡月宮
闕蕭森琅函一封奏罷自鈞天帝所有知音却過蓬
壺笑傲世間歲月駸駸 乙記云青城有天國寺玉
匱經云青城一名青城都一名天谷山谷音近國卽
天國也方輿勝覽天國山在永康縣左連大面右連
鶴鳴前臨獅子後枕大隋上有龍池及融照寺按卽
天國寺也云是黃帝築壇封甯封處未詳唐真人張
令問隱居於此號天國山人以詩寄杜光庭曰試問
朝中爲宰相何如林下作神仙一壺美酒一爐藥飽

聽松風清晝眠山有玉女洞亦曰素女碑目隋刺史薛道衡磨崖碑在玉女洞後 五嶽圖曰青城山七十二小洞應七十二候八大洞應八節玉女其一也元中記曰青城洞穴分三孔西北通崑崙外史言有李氏好道嘗率丁夫持炬賫糧入山下古洞行三日至一大溪不得涉而止比出洞口石自合迷不知處寰宇記云聖母山高二千餘丈週三十餘里其南有深洞在八大洞之數傍山行高下與青城相接當吐蕃之界谿谷深邃夏積冰雪所以限夷夏也大面山在三溪北杜光庭曰前號青城後曰太面其寔一


耳按此溪水色黑又名黑水溪雲笈七籤隋渚聖母黑水溪人悟達國師題其居爲聖母院山亦從而名之宋時山中有二隱士一曰譙先生定字天授建炎初召至陽州留入講筵不可拜通直郎致仕百三十餘歲猶存巢徑險絕人不能到先生數年輒一出山前人亦罕有見之者一曰姚太尉平仲字希晏靖康初在圍城中夜率將士攻賊營不利騎駿驢逸去建炎初所在揭榜以觀察使召之不出淳熙間有于丈人觀道院見之年近九十紫鬚長委地蓋皆得道于山中也 錄異記青城縣西北二里有老君觀門東

上有一泉號馬跑泉水味甘美四時不絕春夏如冰
秋冬反溫昔老君與天皇真人會真之所其泉是老
君所乘馬跑成卽沖妙觀也碑目沖妙觀記杜光庭
撰 勝覽云飛赴寺在青城縣飛赴山下舊名昌聖
院乃唐左軍容使嚴君美捨宅有四望亭呂汲公詩
最勝西峰下林梢四望亭江山觀掌握梁益布丹青
文陵州詩平林露層巘上獨置孤寺羣仙馭飛駕往
往赴於此風光幡影亂日落鐘聲起誰可謂詩豪興
來吟萬紙 志云香積山寺卽靈岩寺也有瀑布及
維骨禪師塔卽周地圖之通靈山寺又云今縣東南

四十里承天寺有馬祖靈骨塔高丈六尺俗呼爲馬
祖寺有碑云大歷間靜照頭陀建雲峰道場至宋宣
和奪以予黃冠者於是師之靈骨與塔俱遷建炎三
年復還舊物建塔於故址栴生石合讖記冥符焉紹
興年元立石 碑目云青城寶幢院記元和十四年
立觀音院記乾符二年立改海晏寺記中和二年立
俱在海晏殿中 艾子云蜀青城山老人村有五世
孫者道極險遠生不識鹽醢而溪中枸杞根如龍蛇
飲其水故壽近歲道漸通漸能致五味而壽亦益衰
方輿勝覽老人村在大面山之北昔人避難其中多

享年壽故名或云潛夫張不羣入山採藥浹旬不返見一叟致敬而問荅曰本丞相范賢之裔知李雄之祚不永挈吾輩居此爲終焉之計圖經云卽獠澤也在青城北百三十里昔諸葛亮遷羣獠于山下故名碑目云獠澤水石記在路次石門崖壁上吳行魯大中七年奉使巡邊行所鑄按志獠澤關在縣西南百里乃董卜胡通華捷徑也古今記云老人村有牡丹坪王漑序謂有牡丹高數十丈花開盈一尺范至能詩十丈牡丹如錦蓋人間姚魏敢爭春卽此方輿勝覽云牡丹坪者自青城之長平山捫蘿而上歷

鳥道三十里許有平阜數十畝高樹蔽天春深先花後葉狀如芙蓉香類牡丹譙定天授季浩太素二先生隱其中云



蜀中名勝記卷之七

閩中曹學佺能始著

成都府七

崇慶州

王勃送杜少府之任蜀州詩城闕輔三秦風煙望五
 津與君離別意同是宦遊人海內存知己天涯若比
 隣無爲在歧路兒女共沾巾宋之間送趙少府之蜀
 州詩餞子西南望煙綿劍道微橋寒金鴈落林曙碧
 雞飛職拜輿方遠仙成履會歸定知和氏璧遙掩玉
 輪輝崇慶在唐稱蜀州也碑目云天章雲篆碑在

蜀州唐開元壽王清書又云蜀州刺史廳壁記大歷年間作以張柬之鍾紹京李峴王縉四公皆牧是州故有四相堂唐詩紀事云貞元十四年皇甫澈刺蜀州時賦四相詩序云居相位者前後四公謨明弼諧遷轉歷比願已無取忝跡於斯景行遺烈嗟歎不足也謹述其行事詠其休美庶將來君子知聖朝之德云爾 本志云州治判官廨後池卽罨畫池趙抃有蜀倅楊瑜邀遊罨畫池詩占勝芳菲地標名罨畫池水光菱在鑑岸色錦舒帷風碎花千動烟團柳四垂巧才吟不盡精筆寫徒爲照影搖歌榭分香上酒卮

主人邀客賞和氣與春期 勝覽云文潞公祠在判官廳蓋公之父在天禧時來作判官令公受業於晉原大夫張錫之客任君後爲立祠 紀勝云西湖在郡圃蓋皂江之水皆導城中環守之居因瀦其餘以爲湖也范成大吳船錄云蜀州郡圃內西湖極廣袤荷花正盛覓湖船泛之繫纜修竹古木間景物甚野游晏繁盛爲西州勝處陸游劍南詩藁云蜀人謂唐安有三千官柳四十琵琶故詩云歸心日夜逆江流官柳三千憶蜀州致能詩云閒隨渠水來偶到湖光裏仍呼水月舟徑度雲錦地誰云不解飲我已荷香

醉湖陰玉嬋娟簷立紅粧外何須東閣梅悠然自興
思驚風入午暑水竹有秋意采菱不盈掬興與蓴鱸
會遙知新津宿魂夢亦清麗 碑目云范公鎮留題
在府城之太平院范遊岷山過此題紀院之經閣上
云熙寧八年三月遊青城間四月趨峨眉俱過此與
百世相見百朋百嘉侍行蜀郡公記 志云西南附
郭龍門街是晉原縣治寰宇記云白馬江自晉原縣
入新津縣界卽杜甫詩白馬江寒樹影稀者 碑目
云蜀先主碑在晉原縣西南二里唐房瑁撰又云唐
開元碑天寶八年立在晉原常清觀鮮于仲通撰

周地圖記云晉原西五十六里墓頤山上有鹿市百
步平坦諸山之鹿日一聚於此 寰宇記云鶴鳴山
在晉原縣西八十里絕壁千尋李膺益州記張道陵
登仙之所嘗有白鶴遊其上北與邛州交界又云臨
邛故城俗名公孫述城益州記云蓋李雄據蜀李壽
從牂牁引獠入蜀境自象山以北盡爲獠居臨邛舊
縣因茲置也 志云蜀州有東亭杜甫和裴迪登蜀
州東亭送客逢早梅相憶見寄詩東閣官梅動詩興
還如何遜在揚州此時對雪遙相憶送客逢春可自
由幸不折來傷歲暮若爲看去亂鄉愁江邊一樹垂

垂發朝夕催人自白頭 志云東三十里江原鎮卽漢江原縣治華陽國志江原縣郡西渡大江濱汶井江水經云汶井江亦李冰所導井上有守捉三十里上有天馬祠李膺益州記寧州有馬元河河邊牧馬產駿駒一日千里至此斃之岸南人爲立祠于此水經注小亭山有天馬塚是也 寰宇記云鄴江出麩金一名皂里水自永康軍青城縣百丈水南流入江原界志云皂江逕江原至新津入河昔張道陵投墨于江其水盡黑故名皂江有北橋杜甫詩云望極春城上開筵近鳥巢白花簷外孕青柳檻前梢池水觀

爲政廚煙覺遠庖西川供望眼唯有此江郊 勝覽云杜工部祠在江原縣邑宰趙抃建昔杜甫暨高適寓於此 寰宇記云公孫述女冢在江原縣東一十三里高三丈週迴二十步故老傳云此冢銅作絞絡五里故亂離發掘莫之陷也 碑目云唐李百藥碑在江原縣之萬歲寺唐樊知遷碑在江原縣淨居寺顏師古撰今俱殘缺又云唐太平公主出家勅在天慶觀按魏了翁江原縣天慶觀雲層臺記略云開禧三年春蜀盜未平江原道士呂元素語其徒曰吾儕小人羣居族食無益縣官今逆氛若此又不能剽刃

賊腹膏首原野盍姑杜門以需底定乃相與校藏書見其書有爲九層之臺可以爲民禳沴祝釐者則用其法而封之名以雲臺列天地日月星辰岳瀆之象而禱祠焉 宋皇祐間趙閱道爲江原令其二弟抗揚與俱有引流聯句序云江源縣江繚治廨址而東距三百步瀧湍馳激朝暮鳴在耳使人聽愛弗倦遂畱渠通民田來園亭堦廡間環迴遶旋溝行沼渟起居觀遊清快心目公暇事休與弟抗揚坐東軒樂然盤杯共爲詩章云別派從江垠邀流入農畝淙淙來源深漑漑度溝淺園穿蕭艾芟塹斷荆芝剪疏功浹

旬流漑利千步遠田觀疑澤瀘坎聽類瓴建北溟歸鑿池幽岳漾裝巘瀉堺穀微駛迴澗珠細轉過寶石眼窺經虛吐口吮流行拂落葉浸長浮生蘚孤鶴眼怪覘纖魚鬣跳展申沈無穢淤底靜有紋堞映葦色莫分喧琴韻難辨增霖夕鬧蛙涵月夜驚犬侵篁鞭起萌逼水抵垂茵憐黃澆菊籬惜紫沃蘭畹吏治窰璧瓚童戲芒車卷灌攜合手勞漱掬致腰俛庭秋臨加涼軒夏向消烜我矜竟濟能僮賀遙汲免貶庀理巨甌歸廚架修篔供淘飯益糧給澳羹鼎鬻調藥修舊餌煎茶試新葍坐客頻泛觴蹲兒屢洗硯聆寒心

蛻煩挹冷酒除面間眺筇步隨靜看髭吟撚高懷造
文攄清興團詩遣瑰章非俗成怪句自幽選湧詞波
翻瀛綿意緒抽蠶書丹字隸行欵碣石磨琬題爲引
流篇記耳非自銜

新津縣

張天覺以古三墳書得於縣北陽氏家墳皆古文傳
乃隸書天覺新津人 范成大新津道中詩雨後郊
原淨村村各好音宿雲浮竹色清溜走檻陰曲沼擎
青蓋新畦藝綠針江天空闊處不受暑光侵予以萬
厯庚戌過此詩云結束爲津口分明作秀顏雪峰俱

映水天社舊名山客自荆吳外民其邛蜀間昔賢有
佳句磊落動人寰壬子歲再過此詩云風日何淒緊
予行在仲冬平林煙已盡近郭渡猶重古市沙中火
僧樓水際鐘東西雖不辨彷彿認前峰蓋指修覺山
也 志云南一里修覺山神秀禪師結廬於此唐明
皇駐蹕爲題修覺山三字寺有左右二井春夏汲東
秋冬汲西水則甘冽反之則否名曰林泉殆靈泉云
其下爲三江渡因岷江息水白馬三江並列而名其
上爲寶華山橫跨江表俯瞰平川取物華天寶之義
也峰頂多雪又名雪峰杜甫新津寺寄王侍郎詩何

限倚山木吟詩秋葉黃蟬聲集古寺鳥影度寒塘風
物悲遊子登臨憶侍郎老夫貪佛日隨意宿僧房又
遊修覺寺詩野寺江天豁山扉花竹幽詩應有神助
吾得及春遊徑石相縈帶川雲自去留禪枝宿衆鳥
漂轉暮歸愁又寺憶曾遊處橋憐再渡時江山如有
待花柳更無私野潤煙光薄沙暄日色遲客愁全爲
減捨此復何之 志又云南二里四安寺亦神秀劔
杜甫暮登四安寺鐘樓寄裴十詩暮倚高樓對雪峰
僧來不語自鳴鐘孤城返照紅將斂近市浮煙翠且
重多病獨愁常閨寂故人相見未從容知君苦思緣

詩瘦太向交遊萬事慵 碑目云唐開元皇帝送趙
仙甫尊師歸蜀詩碑見在新津縣寶貞觀 志云南
二里平岡治下第八治也上應參宿蜀人李阿瞿君
於此學道有杜天師詩 勝覽云投龍觀在新津縣
南六里枕夜郎溪及白木水上有龍穴祈禱皆應
又云稠稔山在新津南八里有草名稠稔服之長生
不死上有丹竈古碑宮闕天池軒轅帝於此得仙中
第四稠稔治也上應危宿 予友竟陵鍾伯敬遊修
覺山記云辛亥十月十有九日早發新津叔弟恬不
知隔江者爲何許山也與童騎疾驅過之子與艾子

後坐舟中指江干削壁千仞竹樹榦桷出没晴嵐雪浪外者異焉問之則修覺山子美遊修覺寺詩明皇幸蜀大書修覺山三大字嵌石壁今猶存者卽其處也決策登焉所從徑裒山石之複者爲磴亂整枉直各肖其理登者屢憇憇處每平平處每當竹樹隙隙處必從其下左方見江江錯積渚或圓或半或逝或返去留心目間土人縛竹爲亂若童子置葉盎中以度蟻設身處地頗危之從上視下輕且駛甚適也度磴去頂可四五之一行住坐立更端者數矣其傍乃有石級齒齒蜿蜒壁間者往修覺寺道也曰姑舍是

尋中徑數折上有亭翼然祠杜工部李供奉蘇端明方正學方有後刻詩可讀亭後數武爲寶華寺禮佛畢反自亭出山門左行竹樹純駁夾砌數折卽修覺寺寺前雙井一井直一塔唐物也明皇書嵌佛殿左側巖壁上字方廣三四尺一字各專一石飛翥沈着且甚完好予入蜀所見唐碑獨此耳出亭無所見欲返寺僧指石隙一小徑才容足出此徑乃有平田大陸復緣磴數折上轟然瀕江者曰雪峰兩寺乃在其下始悟所云磴去頂四五之一者第可指修覺耳非此峰也左眺稠稔山如旅行而稍居其傍下憑欄視

江則已正無所不見不若初所見江之從其下左方也然從下上修覺去江稍遠從修覺上雪峰視江乃反近舟中所指江干削壁者卽着脚處也降自雪峰復遶井塔下屈曲一二里許不復見所由寶華寺徑矣乃忽得所謂石級齒齒壁間往修覺寺道者則今還道也與初所從徑合徑窮登輿是日抵彭山宿

茂州

史記曰南越破後冉駝等皆震恐請臣置吏武帝元鼎六年以冉駝爲汶山郡守華陽國志汶山郡有六夷羌胡羌虜白蘭峒九種之戎牛馬旄氈斑罽青頰

髦毚羊毳之屬特多雜藥名香土地剛鹵不宜五穀惟種菽麥而多冰寒盛夏凝凍不釋故夷人冬則避寒入蜀備賃自食夏則避暑反落歲以爲常蜀人謂之作五百石子也 禹貢岷山導江註曰江水出蜀西南徼外東至岷山而禹導之郡縣志岷山在茂州西北最後番曰列鷲村村有岷山名曰鐵豹一曰羊膊則分水之上源也一自西南入大渡河一自正南入湓村經石紐過汶川水經曰岷山在蜀郡氏道縣大江所出東南過其縣北又曰江水自天彭關東逕汶關而歷氏道縣北註云岷山卽瀆山也水曰瀆水

又謂之汶阜天彭關亦謂之天谷也秦昭王以李水爲蜀守水見氏道縣有天彭山兩山相對其形如關謂之天彭門亦曰天彭關江水自此已上至微弱荀卿曰江出於岷山其始出山也其源可以濫觴焉益州記曰大江泉源始發羊膊嶺下緣崖散漫小大百數始未濫觴東南下百餘里至白馬嶺又自白馬嶺迴行十餘里至龍涸又八十里至西陵縣又西北二十里至汶山故郡乃廣二百餘步又西南百八十里至濕坂江稍大矣河圖括地象曰岷山之精上爲井絡帝以會昌神以建福古蜀謠云汶阜之山江

出其腹帝以會昌神以建福郭璞岷山贊曰岷山之精上絡東井始出一勺終至森溟作紀南夏天清地寔漢書注岷山一名鴻冢一名沃焦在隴山南首故稱隴蜀山直上六十里括地志云中國山川東北流其維首在隴蜀正義曰岷江發源隴山東北流入渤海水經注漢延平中岷山崩壅江水三日不流揚雄自岷山投賦江流以弔屈原名曰反騷也王羲之與周益州書云想足下鎮彼土未有動理要欲及卿在彼登汶嶺峩眉而還實不朽之盛事又與謝安書云周益州書述蜀山川如岷如夏含霜雹校之所聞崑

崙之伯仲也 山海經云岷山神馬首龍身祠用雄雞瘞用黍則風雨可致焉郡國志岷山俗謂之鐵豹嶺陵陽李新詩在昔岷峨神龍文而馬首卽鐵豹之形也 華陽國志宣帝地節元年武都白馬羗反使駱武平定之因慰勞汶山吏及百姓詣武自訟謂歲再度更賦至重邊人貧苦無以供給求省郡郡建以來四十五年武以狀上遂省汶山郡復置都尉 唐茂州都督府壁記云貞觀初置羈縻州九曰維翼笮塗炎徹向冉穹維州今威州翼州今疊溪自笮以下則皆白狗羗云其時一州所領不過數十里而已

寰宇記云梁普通年於此置繩州取桃關之路以繩爲橋也繩橋之法先立兩木於水中爲橋柱架梁於上以竹爲絙乃密布竹絙於梁繫於兩岸或以大竹落盛石繫繩於上又以竹縲布於繩夾岸以木爲機繩緩則轉機收之智猛法師所謂水崖皓然百千餘仞飛絙爲橋乘虛而過窺不見底仰不見天寒氣慘酷影戰魂慄是也又有度索尋橦之橋大江水峻極如箭兩山之脇繫索爲橋中刳木爲橦拴繫行人於上以手自緣索到彼岸則旁有人爲解其系尤極危險陸游詩度索臨千仞梯山躡半空卽此 方輿云

相公嶺亦名茂濕州之主山也州治內有雪峰堂又有列岫堂鄭微列岫堂記云九頂列於南屏風盤臺列於西巨人橐駝列於東又有練光亭王咨留題云汶江自微外東繞汶川郡西北出極目可百里許每朝陽舒彩夜月流天之際一望水光若萬丈長虹天矯其上而吐吞之也舊有亭曰觀瀾據城之隅不與景會因取少陵賦岷山沱江圖山虹飲練光之句以練光題其額云 碑目唐刺史黃堂梁記爲寶歷元年刺史竇季餘大中三年刺史劉成師咸通三年刺史蓋巨源題又云張延賞修城記載唐大曆十四年

吐蕃大下火焚郊館興元元年張延賞重修其後別駕大夫修建城宇堡壁雉堞又云唐迴車院碑刺史蓋巨源撰大中十三年立又云茂州治平寺碑寺舊在城外緣叛羌董阿丹焚毀元豐初移剏城中 勝覽云巨人山在州南三十里山頭有石如人立面南玄宗幸蜀時以石人背立勅令鞭之一百下有九池俗傳是九龍湫其湫四山環遶百二十里 又云雞宗山在州南四十里扼羌人出入之路熙寧九年置鎮羌寨按宋史熙寧九年靜州楊文緒導番董阿丹作亂聲援俱絕至書木牌投于江以告急朝廷遣內使

蜀中名勝記 卷之七
王中立將兵旁出雞宗山擊之文緒等伏誅碑目云
政和丁酉倅貳跨鼇先生李新目擊靜州之變記載
其事甚詳名更生碑今在更生閣 演繁露云蘇易
簡言本朝使人至西番見有老人消縮如小兒伏梁
上雞窠中乃其見在子孫九代祖也其說甚怪丙申
十月十六夜寓直玉堂閱史見貞元間韋皋攻吐蕃
其所攻州名有維保松及雞栖老翁城予欣然自笑
曰易簡之說豈因此二城名而增飾之耶按寰宇記
茂州西北至吐蕃栖雞城下或卽此處

汶川縣

華陽國志漢嚴皇后爲汶江尉成都人仲昱少受學
於皇后及爲汶江以書呼昱許十月往會夷反斷
道昱期必往經渡六十幾死數四卒得至汶江乃爲
皇后陳策俱得免難遠近欽之按漢武置汶山郡卽
置縣曰汶江縣 水經註曰江水又逕汶江道汶出
徼外岷山西玉輪坂下而南行又東逕其縣而東注
於大江水經又云江水歷氏道縣北有湔水入焉註
曰水出綿道亦曰綿鹿縣之玉壘山呂忱云一日半
浣水其下注江接汶川本漢綿鹿縣地 寰宇記
云玉壘山在縣北三里又有玉輪坂其下汶水所經

蜀中名勝記 卷之七
謂之玉輪江山出璧玉卽郭景純所謂玉壘作東別
之標者 勝覽云七盤山去汶川縣九里志云卽玉
壘關也賈島送玄巖上人歸西蜀詩玉壘山中寺幽
深勝槩多藥成彭祖搗頂受七輪摩去臘催今下流
光等逝波會當依糞掃五嶽徧頭陀 勝覽云慈母
山在青城山東導江人馮大量與神仙相遇入隱此
山外史云滋茂龍池在汶之尤溪萬山叢立中有方
池週四十里廣幾百畝清水鏡開芳草四積眞靈境
也登眞書云滋茂池龍一曰慈姥在益州西南四百
里有靈藥可以已疾山無毒害猶慈姥焉故曰母田

況益州龍祠記云蜀之西山有池曰滋茂亦曰慈母
以其能興雲雨救旱暵楸養百穀而名唐開元中章
仇兼瓊旣得平戎城夢一女子謂曰我此城之龍也
今棄戎歸唐願有以居我章仇異之表爲立祠按總
志慈母山在縣南百五十里昔有婦人引子采藥山
中虎負其子去母逐虎不得因長號而絕見者哀之
曰慈母也則其所載又不同矣碑目云滋茂池善應
廟碑張商英無盡處士撰其神或傳姓吳或傳姓郭
頗有異同 勝覽云龍洞在牛溪鎮入洞數步向南
石壁有穴可通無路可陟掌洞道人附巨竹一枝於

穴內令遊人攀竹而上可達龍池 文同茂州汶川縣勝因院記云繇玉壘南下過笮迤西循皂江左折越太平渡行深入曲無慮六十里至茂之汶川有地曰柘平羣山却立大陸初露畦麻贈稻杳遠空濶披壩帶麓壤土鮮潤景物瓌麗人物純篤就其佳處有院曰羅漢昔有頭陀德欽戒操甚嚴歲臘居久其徒委散是身獨在常懼其所將底墮落願擇高行屬以香火得永康軍大中祥符寺僧義海者付之至惟簡師凡五世也惟簡性顛潔所趣端慎守僧律作佛事癯形晦面不避風雨遠近四衆咸宗仰之既至此地

乃圖崇飾伐木鑿崖大輯材礎構廣廈設尊像儲祕典納淨侶凡所欲有一一完具殆逾一紀功力方絕以名上列乃錫今號庭堂虛敞檐宇飄動丹明碧照纒繡岩谷誠歸嚮之福地而莊嚴之道場也惟簡余之邑人遠來求紀其事間嘗謂余曰青城諸峯惟大岷最爲高厚然丈人上清之望者乃世俗之所能見爾如吾所居正向其面脈絡表裏披斂出沒澗壑鉤蔓巒嶺曲折高林巨樾巍崗險頂晨霞夕靄染漬輝耀湍瀑淙激禽虫啼響一日萬狀無有窮極鬼眼傾耳不知厭倦此方外清絕之境世間奇偉之觀而惟

簡輒擅有之山林之人所獲多矣安得君之車馬一
至其地以幸吾言之不誣余聽其說袞袞令人喜聞
回視此身若處泥穽何時濯洗以從師傲兀於其間
哉因命筆綴次其事使歸琢諸巖石遂以爲記云熙
寧二年十月十五日

威州

漢徼外冉駹之地蜀劉禪時姜維馬中等討汶川叛
羌其屯兵之處號爲姜維城唐武德七年白狗羌首
領鄧賢佐內附於姜維故城置維州以統之至上元
之後河西隴右州縣皆陷吐蕃贊普更欲圖蜀州累

急攻維州不下乃以婦人嫁維州門者二十年中生
二子及蕃兵攻城二子內應城遂陷吐蕃得之號無
憂城外史云古維州在今保縣之外可八十里其對
面有無憂城三面臨江巋然峰頂寔諸夷之襟喉中
國之要塞也李文饒籌邊樓故址存焉今棄爲外徼
矣按僞蜀永平二年改維川郡爲保寧縣徙治中州
城卽今治也州治後卽玉壘山蜀後主觀湔江至此
親書玉壘山三字於州署其大盈丈左有龍洞焉湔
水自玉壘峽出而注爲泉有魚長可徑尺州人以爲
神魚無敢捕者 本志云州城原爲汶川縣址城內

之民半屬汶川城以外純屬汶矣碑目云鼓角樓記
唐維州軍事判官高測撰乾符五年十月十五日維
州刺史李光置又云天寶寺碑唐咸通六年建軍事
判官陶師撰又云伏波廟碑咸通八年左武衛兵曹
參軍崔遂撰俱在維州 張舜民畫墁錄云凡自岷
州趨宕州沿水而行稍下行大山中入棧路或百十
步復出略崖嶽崆不可乘騎必步至臨江寨得白江
至階州須七八日其所經皆使傳所不可行攷之山
水秀絕天下無有也臨江寨上望一處當大山中西
望雪山日晃如銀其高無際出衆山上居人曰此雪

山佛居也有獅子人常見之非西域雪山是蜀所記
無憂城東北望隴山積雪如玉耳

保縣

志云姜維築維州城遂築下邑其舊址在南溝之西
李德裕築無憂城重築薛城戍舊址在縣東葬墳壩
又云縣四里編戶七姓耳通化鹽溪已併入州所
存者玉山箭上二里皆番也近亦叛去按通化縣本
唐咸亨二年刺史董弁招慰生羌置小封縣在西蕃
通鶴軍垂拱二年城爲北番所沒今置在威戎軍西
宋宣和加封西岳神勅詞云維彼通化地當西極金

天氏之分域也卽隋之金川縣云今屬州爲通化里
 鹽溪縣隋之定廉縣與金川同置者唐貞觀初改
 爲鹽溪縣以村有鹽溪皆得採漉今演化禪師所居
 之地 玉山夜靜恆有霞光冉冉橫山前東北半壁
 天皆丹色照林木如畫至旦方滅俗名爲筆架山
 箭上在縣東里許一岡陡直而下如矢曰箭嶺又云
 箭上卽唐之守捉城也亦不屬內地

蜀中名勝記卷之七

蜀中名勝記卷之八

閩中曹學佺能始著

成都縣八

金堂縣

水經註云新都縣有金臺山水通於巴漢以水出金
 沙因以名山蜀記云金泉縣古有金船沈江之東岸
 水底民於水中往往見之 寰宇記云縣卽漢處
 士段翳宅也輿地碑目云段翳宅治內天慶觀是有
 段隱居李真人二像碑字磨滅不可讀又云如舜禪
 師碑銘在金堂龍槐院唐節度使杜悰撰文 宋之

問送楊六望赴金水詩借問梁山道嶽岑幾萬重遙
州刀作路絕壁劔爲峰惜別路窮此留歡意不從憂
來生白髮時晚愛青松勿以西南遠夷歌寢盛容臺
階有高位甯復久臨邛宋勾龍行父送孫太冲詩金
淵春三月桃李照城郭石峽蘋鯉魚時時醉賓幕

金淵志云懷安蕞爾國而有雲峰月峽之勝山之雄
峙從梁劔而來江水洪深自壩灌洛而至晁公武作
雨零堂記云堂依雲麓而中江縈之氣象蔥鬱巖壑
洲渚之美映帶左右

按中江在軍西北源從漢
州彌牟洛水毗橋等三水會爲一江志云東十二里

曰前河卽彌牟水又三里曰後河卽雒水也碑目云
有幽州刺史牂柯太守漢張子陽墓在沿江五里許
其碑表載順帝永建四年造又云放生記誓文唐太
和二年令狐紉撰亦在中江岸上 圖經懷安軍縣
二而鎮九以縣而言金堂爲大以鎮而言古城爲富
諺謂軍不如縣縣不如鎮舊縣在峽口距東南四十
里鎮在北一里下爲古城河水由灌子灘入斜潭也
志云峽口相傳鼃靈所鑿又云金灌口東枕雲頂
南披峽口水出山下如岷江之狀上有李冰祠金川
在其下流稍寬平處又云金灌口之東有七織溪白

沙清流文理如織又有柳溪在舊縣南七里常有柳葉從穴中出 華陽國志李冰導洛通山洛水或出瀑口經什邡郫別江會新都大渡志云東南十里有大度鄉漢書新都王恽有陰隲署大度亭長初到日有馬與繡被馳至後爲郾令行至釐亭有鬼夜見稱其夫爲涪令之官過此全家見殺召遊徼按之悉伏辜而還其喪時人爲之謠曰信哉少林世爲遇飛被走馬與鬼語有廟在山麓 志云北十五里昌利山有石室三門容數十人俗呼爲三龍門碑目云唐昌利山有延祥觀碑開元中金堂尉沛國武健撰 寰

宇記云銅盤山在西北二十里北接雒縣南接新都山形如盤洛水彌牟水毗橋水經此山下合中江也 名山志云金堂三學山乃漢州北山一名雲頂一名石城亦名棲賢開照其實一山也志云東三十里三學山李八百三度學仙於此故亦名棲賢其下隘口壁立千仞惟一路可通人騎謂之三學隘寰宇記云雲頂山舊名石城山其狀如城在縣西十五里頂上平可十畝有神泉方丈澄清如照雲霞常興唐天寶六載改爲雲頂山西幸略云唐明皇至劍門山神見形迎駕稱姓李氏後陟武擔東臺遠望祥雲紫氣

盤結空界問左右曰此何處對曰石城山乃悟山神
扈衛之意遂改雲頂爲慈雲焉高僧傳唐開元年鑑
源禪師於此山講華嚴感聖燈現菩薩放光大松林
後有寺額篆書三學字其山四方面各三十里因謂
之開照山 勝覽云三學山有佛迹石理堅潤瑩白
如玉非世間瑤琢所能又有碧玉佛龕藕絲袈裟錦
字心經貝葉金字涅槃經寺前後檜栢皆隋唐故物
又有飛石乃自雲頂飛來先是寺有楠樹已枯石離
而爲二有王頭陀語曰五百年後寺當廢若楠再生
五百年然後復興果如其言碑目云王頭陀塔銘在

雲頂山院貞元十五年薛倕撰又云三學山飛石記
邑宰張西撰又云支提石塔記在三學山唐節度使
段文昌撰又云鸚鵡舍利塔記在三學山韋臯撰又
云李義山爲八戒和尚謝復三學精舍表略云三學
山夜有神燈朝明佛足風飄雨濕且無金燼落時蘇
剝苔侵尙有寶花承處又云杜光庭功德記在三學
山 隋僧智鉉遊三學山詩秀嶺接重煙嶽岑上半
天絕巖低更舉危峰斷復連側石傾斜澗迴流瀉曲
泉野紅知草凍春來鳥自傳樹錦無機織猿鳴詎假
弦葉密風難度枝疎影易穿抱裘依閑沼策杖戲荒

田遊心清漢表置想白雲邊榮名非我願息意且蕭
然唐王勃遊梵宇三學寺詩杏閣披青磴瑠臺控紫
岑葉齊山路狹花積野壇深蘿幌棲禪影松門聽梵
音遽忻陪妙躅延賞滌煩襟薛能自廣漢遊三學山
詩殘陽終日望棲賢歸路攜家得訪禪世缺一來因
薄命雨留三宿是前緣詩題不忍離巖下屐齒難忘
在水邊猿鳥可知僧可會此心常似有香煙又題開
照寺云盡室徧相將中方上下方夜深楠樹遠春氣
栢林香聖迹留巖險靈燈出混茫何因將慧劍割愛
事空王偽蜀太后徐氏漢州三學山看聖燈詩虔禱

聖靈宮賢妃夙志同名香焚靜夜銀燭炫遼空泉漱
雲根月鐘敲樹杪風印金標聖迹飛石顯神功偶望
天涯極臨看日腳紅猿來齋室上僧集講筵中頓覺
超三界渾疑證六通願成修偃事社稷保延洪太妃
徐氏和云聖燈千萬炬旋向碧雲生細雨瀝不暗好
風吹更明磬敲金地響僧唱梵天聲若說無心法此
光如有情宋王雍題雲頂山詩五色琉璃白晝寒當
年佛腳印旃檀藕絲織出三衣妙貝葉經傳一偈難
夜看聖燈紅菡萏曉驚飛石碧琅玕更聞鸚鵡因緣
塔八十山僧試說看

簡州

華陽國志犍為郡牛鞞縣受新都江去郡三百里漢元鼎置有陽明鹽井即牛鞞井也南齊牛鞞戍設在州城西岸即古簡縣址 三國志姜維聞鍾會入犯表守陽安關關在西南三里上流井依山為之舊陽安縣即今陽安驛本此名水經注云晉羅尚乘牛鞞水東征李雄發自陽安關矣 九州要記陽安縣南七十步有赤水如絳源出隆州今治西二里絳溪是也溪上龍門洞有石如龍壁上龍門二字州人許弈所書 柳子厚鉅姆潭諸記乃宋臨歐陽詢書又云

東南有雁水源出廣漢曹榮諍詩城下水流金雁月亭中人弄玉絃琴是也雁赤二水之間有江月樓薛濤江月樓詩凭闌卻憶騎鯨客把酒臨風手自招細雨聲中停去馬夕陽影裏亂鳴蜩 方輿勝覽簡郡設廳棟宇盡唐制梁上題寶歷元年刺史張炎建抵嘉定之壬午已二百九十有八年矣碑目郡守壁記名氏始唐貞觀十三年見劉左史折柳亭記亭在朝天門外舊名情盡橋刺史雍陶詩從來只說情難盡何事教名情盡橋自此改名為折柳任教離恨一條 方輿云紹興中建西州道院在州治南黎持記

云陽安隣於會府而有江山之勝處於高仰而有魚
稻之饒民事獄訟比之旁郡十無一二凡隱於吏者
樂趨焉人目之爲西州道院又云望湖樓在州治道
院之後湖光山色交相輝映輕舟小艇時時撐出柳
陰中不謂重岡疊嶂間乃有瀟湘蒼雪之景也 志
云簡縣忠清門外有唐太子誦書紀功碑甚巨元和
二年朝議郎使持節簡州諸軍事守簡州刺史李維
勒石碑目云南康郡王紀功碑乃憲宗撰文太子誦
書貞元十三年建原在龍興寺宋天聖五年移在州
舊治中頌春亭側又云在郡市心居民室下紹興丁

巳穴土有碑石太守命工取之重撤民屋不果遂錄
其文乃唐御製紀功碑銘并序皇太子書碑面殘缺
不全惟碑陰乃開成元年臯從孫珽爲本州守日記
述其文俱全遂覆之按此碑已取出今存 志云城
內雙市街有叢桂樓以宋紹興中朱熹同榜李瞰如
李進修范時中袁炎牟子正俱州人也太守郭由中
爲樓記 方輿勝覽景德觀在郡南一里山谷集云
簡池覺範道人城東道友也住景德院其家風十二
時似趙州東院西池種竹兩枝於宴坐軒中山谷老
農作頌曰往在江南住竹山道人兩歲三來訪聽風

聽雨看成龍牛羊折角入朝餉簡州城東刮地寒手
種檀欒三兩竿竹成要作無孔笛若有靈龜一任鑽
魯直又有題其也足軒詩詳詩話中 圖經簡有四
岩東西南北也三溪東南前也三池柳鳳賴簡也劉
涇云三溪號一郡之勝前溪在陽安治後亦稱後溪
文同後溪晚步詩云陰陰芳樹暗迴堤路入蒙籠轉
野溪澤雉應媒高復下林鷗引子歇還啼青蒲宛宛
全淹水紫竹斑斑半出泥倚杖風前感時節亂煙斜
日一蟬嘶 巨濟又云南溪壽昌寺前水是也由南
溪沿江一里許爲東溪李良臣詩簡州何處景最佳

東溪奇絕人所誇溪上有白波亭宋姚萼詩賴簡池
臺西蜀誇東溪別是一仙家令人怯意康王谷坐看
珠簾濺雨花志云劉文節墓及讀書樓俱在東溪上
今東林寺是其樓址一名東溪菴 志云柳池折柳
橋下水也鳳池在治南三里水自北一里鳳翅山來
賴簡山接金堂山郡池名皆因之 勝覽云東山在
東江之外州治之左志云在城東五里巖高數丈刻
東岩二大字有東巖院智通禪師卓錫處地居兩山
之間溪流其中下有懸溜清音不絕旁有洞又有古
柏大可二十圍爲一郡之望刹也志云卽天王講寺

貞元初施頭陀剎 近岩有雙牙山兩石對峙如牙
上有井及石箱人見兩金鵝其側晝浴於井夜棲於
箱 蜀志補罅云西巖在簡州湧泉鎮有石刻大悲
像光相屢現志云在治西五里岩洞深三丈五尺闊
如之洞門刻西岩二字宋嘉定甲子王五卿結菴於
此題名 近岩有石柱山孤高獨立上有石像百餘
石室數間有仙人楊氏養丹爐鼎尙存登其巔可望
逍遙山 勝覽云逍遙洞在立都山去城三十里景
德閒有楊用晦者隱居此山其上有層崖命工發之
得東西二室西室後刻二竈若養丹之所又鑿二窟

中可坐五七人東西二壁鐫二孔雀二神人有漢安
元年四月十八日會仙友十二字漢隸也今存按用
晦簡池人有仕才能詩任心自適不求當世樂隱洞
中時太原王載京兆金惟吉南陽鄧曦度杜審嗣劉
旻遠來尋訪刻詩壁閒 志云南巖在治南一里有
洞深三丈闊二丈五尺方輿勝覽南巖有光孝寺前
敞飛閣盡覽江山之勝左有洞可容數十人卽淳風
洞也石刻無名氏詩煙飛嵐翠撲衣裘落日牛羊下
巖頭莫道山中生 意薄江邊桃李自風流簡州學記
李淳風生於州之乾封鎮有故宅及墓按今銅鐘寺

卽報恩光孝寺舊址宋孝宗隆興二年歐陽尉歐陽
獬建疏請衡山和尚住持寺前高敞有會勝亭趙抃
知益州時寺僧有能琴者見知於公作琴軒詩贈之
云輟飲支筇會勝亭溪山佳處古琴橫憑君傾耳殷
勤聽一弄清風四座生諫議大夫張方詩早向溪山
得趣深建亭今復寄餘音紛紛塵市無閒地獨有斯
人物外尋志云北巖在治北二里洞深三丈闊五
尺有坐榻茶竈傍開石牕牕下有泉清冷不竭有寺
舊名白馬院開元中馬祖建倚壁有丈六金身無名
氏詩云一帶江煙半倚巖檻前時眺黑龍潭低昂竹

影疏明月屈曲松枝拂像龕樹老硬根穿石罅草生
嬾葉入禪菴西來白馬無踪跡寒鵲昏鴉暮景含碑
目云院有唐碑其歲月乃大曆時重修石壁刻云郡
守潼川王武卿攜家渡江過唐氏園偶泛舟泊山下
登劉氏江閣因上北巖禮大佛開禧改元二月十有
三日書近巖有洞曰朝陽深三丈餘高丈有八尺
廣一丈內有石牀額篆石室二字蓋昔人煉丹之所
志云四巖附郭之勝也其稍遠者有玉華池天光
觀覺林寺又遠則爲分棟長松諸山寰宇記陽安
縣北二十里玉女靈山東北有泉西北兩岸各有懸

崖腹有石乳房一十七眼狀如人乳流下土人呼爲玉華池每三月上巳日有乞子者漚得石卽是男瓦卽是女自古有驗山爲仙人李八百修煉處 勝覽云李八百居棲賢觀一名天光觀碑目云天光觀在陽安縣東三十里有唐碑可讀者云太和初三洞道士王道賜因張文舉施地基勅建按今爲明教寺志云甕亭山在治南四十里石甕舖有覺林寺在大道旁王欽若題覺林寺詩暫拂塵襟思倍清竹風山色亂泉聲安民功淺君恩重又策羸蹄向古城趙抃詩古寺無碑刻僧云不記年自餘安所問惟是愛林

泉 志云分棟山在州西七十里寰宇記曰山北連秦隴南入資瀘東北入靜戎軍在靈池縣東上十五里劉涇分棟山少休亭記云自成都趨陵簡如在蜀必由靈泉過分棟其山周數百里高大阻險以石次第爲步暑雨冬雪則馬不進僕亦以病告欲少休於是建亭名少休焉 志云西北七十里長松山爲州斧屐界內諸山皆發脈於此長松寺本蠶叢廟址開元中馬祖行空和尚乃建寺明皇召對賜額長松衍慶寺又賜名香爲亭以貯之白御香亭宋賜名嘉福寺今名靈峰 唐鄭谷集云谷自亂離之後在西蜀

半紀餘多寓止精舍與圓昉上人爲淨侶昉公住長松山舊齋嘗約他日訪會勞生多故游宦隔年曩契未諧忽聞謝世愴吟四韻以弔之詩曰每思聞靜話雨夜對禪牀未得重相見秋燈照影堂孤雲終負約薄宦轉堪傷夢繞長松塔遙焚一炷香 志云蟠龍山與長松相接大曆四年郡大夫傅耆造大佛建院曰石門以山石分開似之院門又有石形如夔刻字其上曰夔石楊甲遊長松寺宿石門僧舍以石門霜露白爲韻得露字詩云疾風吹輕衣駕我雲脊路人閒一回首驚絕不敢顧烏投虛無底渺渺不知處蜂

窠蟻上垤與世同所驚試看一蒼莽誰有不平慮尙憐野僧屋佛面荒苔蠹斷崖割呀吻洶洶崩石怒我來得奇觀拄杖叩巖樹青山有驕色斯客不能句平生二三子慰我一相遇娟娟松閒月幽夕亦可度夜闌更小語風逼遺響去酌君無多酒繼以木蘭露諸公綽石門院詩云搖空柳色金猶嫩傍道梨花雪未開咫尺長松煙霧裏石門頂上暫徘徊 碑目云周文王廟碑在陽安縣西北七十五里卽後周高祖文帝之廟舊碑題額云大周植元年歲次丁丑造元年卽後周閔帝之初元也今石刻存 志云去郡治五

十里山曰賴簡自賴簡西互潛度雁江而直走龍泉
又曰隆泉在治北八十里以澗水隆盛爲名 寰宇
記云靈泉在靈池縣南三十五里隋初縣旁出湧泉
因置平泉縣於此唐改靈泉志云廢靈泉縣在州西
北七十里隆泉驛之右楊甲靈泉山中詩云小縣相
籠合濛濛數百家菓蔬爭晚市樵牧亂晴沙落日平
林迥青山去路賒偶居無事在隨意問桑麻又野色
山圍盡風煙更可憐客情牛鐸外農事藕花前聚汲
松根井寬愁石底泉雲安湏斗水詩興亦超然又勝
地仙靈宅微官也謫居焚香他日夢隱几向來書小

睡便山雨長齋稱野蔬逢人間無恙滿意說樵漁又
日下叢林薄芊芊肅晚暉閉門成小隱飲水亦生肥
醉着溪藤杖歸來木葉衣狂歌有虎兕吾道只應非
又何處長松寺雨花雲外臺山從百曲轉路入九關
回老檜成龍盡殘柯借鶴來人間斤斧亂風壑夜聲
哀又靈泉山上晚望詩云野曠樹還亂林深煙更微
天隨殘日盡雲掣斷山飛玉壘風煙闊秦樓草木非
憑高千萬事今夜客沾衣蒲瀛宿靈泉無我軒懷次
山詩幽軒著無我居此合何人聞道東山隱當時此
地親心源將止水世事甚浮塵今日尋遺跡餘空淡

墨春自註云壁間有次山題字也 成都文類益部
十縣多引江水溉田咸爲沃壤惟靈池疏決不到須
候天雨俗謂之雷鳴田縣東山下有朱真人洞洞北
岡嶺連屬逾廿里得褚聖母祠化跡尤異民咸事之
祈禱獲應潘洞詩云錦里城東邑高原十六鄉江流
分不到天雨降爲常節及三春後晴逾兩月強龍乖
尋穴蟄魚困入泥藏樹影全虧綠苗姿半吐黃耕夫
皆慘戚市戶亦倉忙潛慮冤無雪深疑政有傷推恩
慙睿主引咎謝虛皇磬折真人語星奔聖女堂先時
蠲玉饌隔夜沁蘭湯洞口焚香遠山椒作梵長幽誠

期必達立應果旋彰雷振南峰下雲飛北嶺傍聲稠
喧竹塢勢洎瀉銀潢飄灑連三晝霧霽遍一方稻畦
煙漠漠蓮沼水泱泱物態涵優渥民情遂樂康洪施
周庶品餘潤浹他疆稔歲還堪待陰功詎可忘明靈
何以報奮藻紀遺芳按朱真人祠卽安靜觀也楊甲
宿安靜觀詩青山轉龍脊矯首西南天上有仙人祠
臺殿飛後前下見雲雨興樹色暗平川仙人兩黃鶴
一去無歸年向來道上屨人着幾何錢一朝聞羽化
悵望空流涎卻揮囊中金瓦礫來投捐巖巖化金碧
香火通雲煙人間萬事爾旦暮有愚賢而況爭奪場

轉手分媿妍仙人一回首破隴與荒阡紛紛不足道
哀此區中緣石泉瀉幽潔意寂不肯喧夜聞松風露
起坐心寥然又云一濯巖下溪再拜巖中庭清風肅
然來吹我衣上醒仙人芙蓉冠乘雲下月軒山空雜
佩響靜夜朝百靈似聞客欲去小語猶丁甯蕭蕭上
松栢急以兩耳聽寂寥古壇外但掛斗與星天明恐
是夢恍惚遺心形去飲石上泉再讀幽人銘青山無
行迹霧雨松冥冥 古今集記云靈泉縣界有瑞應
院唐永平中段文昌來攝靈泉尉手植四松於此院
有石刻云乾坤毀則無以見寺寺不可毀四松其遠

四松至天福初止存其一縣令張松復補植三株有
栽松記刻於石今不存楊甲詩云木落石出荒山臺
上有佛寺孤崔嵬斷椽圻瓦無四壁古佛已倒何人
推野蜂占窠挾肩背山鼠出穴銜髯鬚老僧見我欲
愁哭野葛蔽路官能來文昌種松有斷刻石柱半裂
荒莓苔老翁鼻祖無一在獨樹晚出非耆鮐乾坤未
變已先滅幾見賊火翻狂雷至今野叟鑿山破石窟
尙有龍筋骸當時手種意已遠欲與草木爲渠魁

仁壽縣

寰宇記云陵州漢武陽之東境晉初西城戍也州南

有陵井周閔帝因以爲州名置陵井監圖經漢張道陵經茲地有山神稱十二玉女指陵上開鹽井監以陵名志地也文同奏疏謂因道陵以名井復因陵井以名州矣大觀四年改爲仙井避其諱云郡國志曰仙井陰氣襲人入者輒死投以火則煙氣上衝濺泥漂石沸吼如雷今玉女祠是其處 王象之碑目云張天師靈廟碑元和十五年知陵州李正卿撰文又云黃帝陰符碑在州城至道觀咸通十五年邱冲書采京記云此中江山瑰奇自古王公貴人詞客才士未嘗一至故不得見於歌詠而爲浮屠老氏之學者

往往擅而有之 方輿勝覽云艷陽洞在州城北至道觀之後昔天師旣誓玉女於井因藏去其衣鎖之石室或謂之藏衣洞洞在重巖下崕岈幽窈晦明變化千態萬狀雖距闐闐不數武而若與世隔蓋道陵修煉之區也杜光庭錄異記云艷陽洞古老相傳在陵州陽山之上從來隱蔽人莫知其處乾德三年辛巳正月十六日癸卯井監使保義軍使太保馬全章夢一紫衣束帶巍冠者狀若道流揖之俱行至崖壁所告曰此艷陽洞也閉塞多年能開發護持可以福利邦國又指其地近開小徑曰可斷之勿使人進踐

踏言訖而去詰旦往尋其所果見土勢微陷以杖導之深不可測節令本軍節級侯廣之勾當人夫斲地漸獲蹤由相次開掘見三重石門洞內竝是細砂一無蟲蟻他物自東入西深三丈九尺闊五尺三寸洞門三重第一重高六尺闊五尺二寸第二重高五尺五寸闊三尺七寸第三重從頂至底一面高六尺一寸三門相去各止三四尺鑿鑿精巧殆非人工三門內南畔別有石房闊七尺四寸高四尺八寸深四尺二寸其後別有一小洞洞門有片石遮掩旁通一縫以燭照之深不知其底北畔亦有石房深四尺闊七

尺三寸高五尺房內有石牀一西畔又有小石房深二尺闊三尺五寸高三尺一寸西北畔有石牀長三尺八寸闊二尺八寸有石竈橫長二尺三寸額闊七寸竈深八寸周圍三尺五寸計從洞門向東一直至鹽井西相去可四十一丈八尺井在洞門正東也全章乃召當井監天師院主內大德費省真問之答云天師院見有元和年刺史李正卿著天師聖德碑云天師以東漢建安二年自沛遊蜀占犍爲分野見陽山氣象指謂弟子此山直下有鹹泉焉今驗此洞正當井上卽夢中所指者也碑目云洞額隸書艷陽仙

洞四字字體兼篆不知何代書旁有欵識歲久磨滅東南賈人見此碑本竇而藏之以爲直漢隸志謂有東漢仙都四字在天師洞未詳碑目又云仙井監有蔡君謨法帖蘇東坡心經帖文與可書千字文陸務觀跋蔡帖云近歲蘇黃米芾書盛行前輩如李西臺宋宣獻蔡君謨蘇才翁兄弟書皆廢此兩軸君謨真行草隸皆備石在仙井可寶也淳熙元年九月八日蜀州手裝勝覽云艷陽洞前有蓬萊閣秦少遊詩雄簷傑檻跨崢嶸席上風雲指顧生千里勝形歸俎豆七州和氣入簫笙人遊晚岸朱樓遠鳥度晴空

碧嶂橫今夜請看東越分藩星應帶少微明程公闢次韻云半天鐘鼓宴崢嶸早晚晴陰景旋生湖暖水香春載酒月寒雲迥夜聞笙金鰲破海頭爭立玉雁排煙陣自橫我是蓬萊東道主倚欄先占日初明按蓬萊閣在治東百許步又有含暉閣近五十步趙閱道詩曉川嘉樹照雙扉披豁幽軒景盡歸自喜吾懷已虛白三隅山色更清輝輿地紀勝云平雲閣在郡圃文與可詩陵陽郡事全稀少懶守長贏半日閑晚後頻來上高閣就中無厭是雲山與可在州送通判喻郎中詩可笑山州爲刺史寂寥都不似州城若

無書籍兼圖畫便不教人白髮生又云近日簿書全
簡少吏人惟聽兩衙休歸來便只尋冠履遶遍林亭
山上頭 與可又有自然水石記云陵陽守居負山
悉石西左砌層崖餘地丈許平夷可屋因植四楹面
午橫楣闢幽軒正對大林高株缺閒視遠峰若畫工
引淡墨作巒嶺嶷嶷時與煙雲相蔽虧愛此有佳趣
復靜密公事少休卽至宴坐伏息日計數取多乃去
外俗不得知旁頽巨礪如瘤宜鑿刻遂磨治將紀建
置歲月沃水盪拭見黝理若髮狀傾灘平波瀾漫飀
迤復疊先後倫次窪淵聳浪左右役目自非人寫神

摹人巧孰能爲是必由融結固已有堅包厚藏待予
始發章物蓋顯晦信在時人理疑亦然苟達此與知
命何遠雖爾既有形必復壞倘後人加護則傳久未
易泐也 李膺益州記云東西南三山相對州治居
其中去陵井各一里謂之三隅山按古謠云三隅青
陵陽榮三隅翠陵陽貴郡守何着仲嘗於東山之下
作青榮臺以表之張紹祖山扉記曰有岡北來莫窮
所自不亟不徐勢趨東南欲薄城下岐而爲三行且
五里虎踞盤礴不復去此陵州之所謂三山也 西
隅曰跨鼇卽州衙坐山李石超覺寺記云州以跨鼇

名者居三隅山之槩也去治半里方輿勝覽云跨鼇山上有跨鼇亭每歲上元重九太守率僚屬燕其上
有石姥在山頂歲旱里人轉徙之天卽黯變雨四注
文同賦云上簪岑之飛泉兮披蒼蔚之榛莽爰有石
之跋跋兮旁無他而相伍其遠睨之若人兮迫猶疑
其蹲虎禮俗神而甚恭兮號相尊而曰姥又云印山
在其坳卽捫膝先生喻汝礪故居 南隅曰翳嘶頂
上有翳嘶廟相傳神卽巴郡太守嚴顏也宋何桌作
碑記併書山前有霄漢堂紹定中隆州軍事推官文
太虛爲碑記俱存山之麓有更生寺宋丞相虞允文

爲其父秦國公建碑云紹興十八年六月二十六日
鄉人鮮于述旣死復甦言地府有更生佛故秦國虞
公祺也明日以告丞相正秦國小祥之期丞相因言
秦國屬纊時微疾耳忽睨坐客古佛俱來吾當歸先
文泣下公顧曰身得爲佛有何不可含笑而逝按寺
在縣東南數百步秦國又有功德院在城西玉屏山
元虞集仁壽寺僧報更生佛祠前生瑞竹詩云聞
道故園生瑞竹令人歸興滿江干扁舟不畏瞿塘險
匹馬誰云蜀道難杜甫溪頭花匝孔明廟裏柏關
珊新堂題作歸歟字定得臨江把釣竿伯生丞相裔

孫也有還鄉詩云還鄉思速去鄉遲王事相縻敢後
期里父留看題壁字山僧打送捨田碑胡桃筇竹南
方要盧橘枇杷上國知此日君親俱在望徘徊三顧
欲何之又云未忍他鄉作故鄉故因使騎入陵陽鄉
人共訝聲音似客路疑將鬢髮蒼親老長懷鄉里思
孫多宜置墓田旁治生自可依諸葛數頃膏腴八百
桑東隅曰飛泉上有超覺寺按圖經隋仁壽元年
獠反百姓城於山頂避難遂有飛泉湧出獠平泉涸
因呼爲飛泉山文與可詩東城兀高峰爽氣浮翠微
霞光射巖壁中有寒泉飛碑目云飛泉院碑廢神龍

元年立超覺寺碑唐明二年陵州刺史蕭兢記志云
超覺寺有爾朱仙影刻二片一全影一半影也有乾
道中虞丞相書碑勝覽云飛泉山下蟠溪丞相何公
桌所居何公始生六日瑞雲山當夜半紅霧互天此
山東去蓋四十里碑目云佛龕山有唐貞觀中率
更令歐陽詢書金剛經磨崖碑按卽佛巖山也在縣
東二十五里志云山有三石像背虛面巖俗呼倒坐
佛碑目又云東北石城山平等寺有天寶四載薛
兼金撰道超和尚旌德碑勝覽謂石壁如城絕頂望
見峩峩也寰宇記云州南一里鼎鼻山隆然特起

又曰隆山隋大業改陵州爲隆山郡本此郡國志云周之九鼎淪一於此往往見鼎耳因名南七里一泉水碧色投銀其中成色卽變孕婦飲之墜胎俗以爲聖泉矣 圖經云南二十里有麗甘山山下鹽井是十二玉女故迹以玉女美麗井水味甘合而爲名也又云古鹽井號聶甘井井旁有神祠號曰聶社 又二十里有儒社山虞允文書碑云紹興癸酉十月八日允文來遊知先世種德本末感愴久之石刻今存佛子寺 郡國志云縣西朝女山昔有女子居山悟道肘脛之蹟印石上猶存 碑目云後唐同光三年

靈泉院碑在本院山上按卽譚子池也亦名天池宋進士郭周藩詩云靈泉在山頭酌之不盈卮試詢陵陽叟何云譚子池一叟爲我言郡有譚叔皮在唐開元末生兒名阿宜墜地解言笑九歲森髯鬣不食且不飲超然忘渴饑十五銳行走質若神駒馳二十入山林人莫知所之父母念不泯鄉人爲立祠大曆元年春此兒忽來歸頭簪鳳凰冠身着霓裳衣再拜向父母一吐心中詞兒乃仙子流塵市不可羈鄉人意雖厚立祠將焉爲妖魅一朝據作祟無休期急爲告鄉人毀之勿遲遲祠下多金藏不知始何時盡取濟

不給幸勿藏於私言訖卽辭去仙袂風披披於焉撤
祠宇突兀成平夷果獲千黃金貧匱得所資金盡泉
繼湧湛若青琉璃不滿亦不涸旱澇恆若斯禱之立
有應翕如墳協篋由來羽化人出處同鬱儀去今數
百載迹在名還垂志云天池山麓有顯忠院宋尙書
僕射何桌藏主處桌從徽欽北狩死沙漠華表柱猶
存又有寶籙院宋寶謨待制陳咸葬所號寶謨阡已
上在北二十里宋故事名位顯者得於墳側建刹度
僧以薦先福焉志云陵州梵宇多以龍名若龍興
龍居龍泉龍厓是也龍厓者鐫石爲龍卧厓下卽文

與可鐫怪石墨竹處跨鼇山人李斯題云淺稍疏節
似瀟湘正向祁寒敵曉霜清興未窮僧已老自餘山
色與溪長雅安僉判程壬孫詩風雨勞先別敢辭尊
酒深一梢牆上竹留作歲寒心俱在寺壁龍興卽報
恩寺寺有大悲堂大悲閣王象之碑目云龍興寺大
藏經碑開成四年吳商撰古大悲堂碑乾符三年周
宋莒撰俱在報恩寺篆字心經碑咸通七年仇溥撰
并書修大悲堂碑景福二年僧承微記俱在小大悲
閣又云僧曉微碑在寶林院西蜀明德元年立又有
顯教大師碑廣政四年立鐵騎將軍碑在歸安鎮孟

蜀廣政二年立 寰宇記云貴平縣漢廣都之東南境後魏時與平井縣同置舊治和仁城開元十四年移治祿川一統志云元憲宗時併當縣按圖經祿川距貴平縣三十步發源簡州下注資江而東水多魚蝦縣人利之過祿川有蘭溪唐隱士張鴻居其上按益州記平井縣兩竈二十八鎮日收鹽四石如霜雪是也 碑目云貴平縣文宣王廟碑長慶五年陵州刺史李正卿撰尹泰階書按碑在縣址後百步可搆而聖賢石像委榛莽中近方瘞之碑後巖下 寰宇記云唱車廟在貴平縣南九里漢朱辰爲巴郡守有

恩於巴吏人送辰到蜀回至此爲辰立廟以其山近鹹井聞推車唱歌之聲爲名今鹽井推轆轤皆唱爲號令焉碑目唱車山開國王碑貞元元年貴平令王覺撰牟尙書墓記同光五年領州事陳貴民撰 又云貴平西北四十里寶峰院有唐人撰寶峰院記院內有王羲之記王氏廬墓銘按志邑王氏女至孝親沒廬於墓側三年有司立碑表之王羲之爲作廬墓銘剝蝕殆盡 寰宇記梁天監置席郡隋廢爲縣里語譌爲籍縣志云在縣百七里今爲鎮又籍田公館近華陽界縣南有地畝餘踏之軟動有泉淵灑旱不

涸湧不溢名曰息壤魚蛇水在其北導江水在其南
丹砂山在其西 碑目漢黃龍甘露之碑在籍縣
江口上銳下方其狀如鐘大書漢黃龍甘露之碑七
字餘不可讀其可識者羣臣將軍位號蓋為龍紀也

井研縣

寰宇記云縣本漢武陽地有彭山彭首獠姓在始建
鎮之東志云後魏置蒲亭縣今縣東一里黃丞相池
是也池中生蒲起亭以存古意 周地圖云蒲亭縣
有鐵山諸葛亮取為刀劍宇文度封鐵山侯即此志
謂鐵山一名茆香山在縣東六十里舊始建縣東

寰宇記云井鑊山在縣北其山俯臨井鑊因以為名
玄宗幸蜀井鑊山神見即此山也 碑目云唐節度
使楊公墓碑在隆州井研縣道傍有石刻云唐銀青
光祿大夫檢校御史中丞上柱國節度使楊公墓旁
多楊姓乃其子孫也又有宋何桌撰陳德用墓碑銘
在縣南四十里木龍鄉宣和六年立又有青陽仲廣
塔記在縣之天王寺其略云寺有塔以藏舍利為層
十三此釋迦氏殊勝莊嚴僧祖逢建始於隆興壬午
基就力不繼邑人憫焉願續其事邑之利源以鹽自
一層至九費所取者三之二施心尙未厭又合力為

第十層工徒輒瓦之供自十而上合尖有期矣嗚呼
事有一人營之百人終之者不營於始無以開其先
不續於終無以卒其功百人者一人之繼是塔之興
雖多歷年所然終於有成者百人之助也掌化任剛
乞文刻石置層上以紀歲月云

資陽縣

華陽國志資中縣受牛鞞水寰宇記縣本漢資中縣
後周武成於資中故城置資陽縣以資水爲名 志
云城西二里資谿縈紆九曲合流雁江近掘得宋張
方題資谿橋詩有資水右旋江會合之句 王巖資

陽江詩淡雲殘雪簇江干策蹇遲徊客興闌持鉢老
僧來呪水倚船商女待搬灘沙翹白鷺非真靜竹映
繁梅柰苦寒 阮籍莫嗟岐路異舊山溪畔有魚竿范
祖禹月夜船行入資川詩憶昨卧碧山蒼蒼叢桂間
白雲爲屏石爲枕綠蘿長掛明月閑忽乘輕舟泛江
水山月隨人還在此白鷺驚飛宿靄間青山倒卧蒼
波底此時孤棹發中流川後停波聽棹謳不學子猷
中夜返欲乘明月向資州 志云漢王褒故宅卽今
縣理解中八卦井三字子淵筆也輿地碑目云西漢
王褒宅在資陽縣西駟馬里今改爲靈仙觀有觀碑

二說微有不同舊圖經云資陽南五里書臺上豐碑廿餘片刻聖主得賢臣頌山是王子淵讀書處有洗硯池一勺又云縣之延壽寺漢董鈞故宅也志以爲宋張方宅按亨泉墓在縣北廿里有石獸存其宅未詳方輿勝覽資山在縣西南三里迥然秀拔卽寰宇記之獨秀山也范祖禹資山詩云醮壇巖谷多神仙鸞車鳳輦隨飛煙神女瀟瀟來暮雨浮丘往往下雲輶碑目云資陽有三仙磨崖石在三江鎮刻云貞元十四年十月十日杜錫崔熊席夔三人同遊郡國志資陽有陂溪百丈池所謂溪流如陂池深百

尺志云學宮前有星月池有井傍池如星東一里有放生池有碑碣顏真卿書南廿里有孔子溪石壁上鐫孔子字云其地昔有鄉校祀夫子刻記猶存

資縣

禮記萋弘氏孔子嘗問樂焉死之三年而血化爲碧按圖經萋弘資中人有祠在青泥坊數里之內土色尙青又云王子淵墓在縣東二十里墓前石碣高丈餘碑目云王褒墓左有河相弘農碑未詳人代唐元和中羊士諤爲資州守風流文采照耀一時其詩云洛陽歸客滯巴東處處山櫻雪滿叢峴首當時爲

風景豈將官舍作池籠登郡前山作也一雨東風晚
山鷓獨報春淹留巫峽夢惆悵洛陽人柳意籠丹檻
梅魂覆錦茵年華行可惜瑤瑟莫生塵郡中早春作
也腰章非達士閑閣是潛夫匣劍甯求試籠禽但自
拘江清牛渚鎮酒熟步兵厨唯此前賢意風流似不
孤郡中詠懷作也二毛非騎省朝鏡忽秋風絲縷寒
衣上霜華舊簡中承明那足厭車服愧無功日日山
城守淹留豈桂叢郡中見白髮作也又郡齋讀經作
云壯齡非濟物柔翰誤爲儒及此齋心暇翛然與道
俱散材誠獨善政覺豈無徒半偈蓮生水幽香桂滿

爐息陰慙蔽芾講義得醍醐跡似桃源客身嬰竹使
符華夷參吏事巴漢混州圖偃草懷君子移風念嗇
夫翳桑俄有績宿麥復盈租圓寂期超詣凋殘幸已
蘇解空囊不智滅景谷何愚幾日遵歸輒東菑殆欲
蕪竇叔向雨後月下寄懷羊二十七資州云夕霽涼
颯至翛然心賞諧清光松上月虛白郡中齋置酒平
生在開襟願見乖殷勤寄雙鯉夢想入君懷 碑目
云羊士諤在郡有毗沙門天王贊碑歲久陷於城北
隅紹興中邵博爲守始掘得之又云青松亭記在毘
治唐乾符四年西川節度使成都尹高駢文并書又

云瀛洲亭在郡圃繪唐十八學士鮮于侁文并書又聚書樓記李石文博雅堂記張震文俱乾道七年立碑聚書樓記略曰國家渡江以來脫五厄之會收四部之富頒詔首降三館所儲兩學所集分錫郡國州有書樓侈其賜也自宣和辛丑前太守魏侯潤博以州號多士請於朝減他州之賜以益此州宛乎如韓宣子所見周書之在魯矣歲久鼠穿魚蠹且爲有力者夜半負去今守宇文侯爲州起發手書之家傳人有殘缺散逸者咸綴錄焉比舊目增千餘卷因舊樓徙故葺新復爲厨肆貯之博雅堂記略曰宇文

紹弈爲資守風清事簡則歎曰自吾承先大父右丞相公餘烈以詩書發身凡二十年間聚書上自孔氏下至歷代諸史稗官小說與夫國典名公之文合萬餘卷手所校錄者幾半之不爲不多矣顧猶有遺恨者嘗見前漢文字之奧篆隸之工鏤金石而傳後世尙有可攷乃其在中原者淪於夷狄後生不可復見吾家故所貯吾幸得之不欲擅而有也盍傳之是邦以與學士大夫共之於是摹刻漢石經及他碑凡五十四卷覆以石柱大厦名其堂曰博雅登堂斯者如入太廟見尊罍彝鼎簠簋孟豆之陳聞咸韶濩武雲和

篋篋之音列天球河圖寶玉大弓之器饗太羹玄酒
昌歆醢粢之味莫不咨嗟嘆息以爲君侯好古博雅
之士矣 方輿勝覽云企仙閣居郡治北憑高視下
得一郡之要李石爲記以李傅侯張各據一山合四
山而拱揖之故曰企仙亦曰蓬萊 志云州北二里
醮壇山李阿修煉處肖像猶存杜光庭有醮壇山北
帝院記以爲張道陵居焉山畔有洞鑿石七十二級
遠望之如入雲中范祖禹詩醮壇高倚碧天開中有
清都白玉臺霧擁雲旌乘月去風吹仙樂下天來
方輿云縣西三里平岡山傅仙宗所宅也崔中吉崔

達亦居此 志云玉清山上可以瞰平湖在州南二
里侯真人遺迹存焉又云得道山在州西十五里張
開光於此得道也碑曰陳圖南得道山詩鑄於石壁
邵博跋 宋景云東蜀領郡十六而江山瑰琦資中爲
最資中勝遊十數而北巖爲最謂縣有東西南北四
巖也圖經距州城東三里曰東巖形若剖資側立千
尺溪壑深杳石壁上刻中興頌顏魯公書縱廣盈丈
去磨崖五里有唐明渡以明皇所經也巖上鑄宋承
議郎鄭綱詩云逕轉得幽谷雲巖屹相向谿衍偃重
簷灣環依疊嶂緬想融結初鑄鑱自天匠了無斧鑿

跡但覺盤根壯深可數千尺廣逾八九丈洞穴既窈
窕松門亦昭曠廓含三千界中列五百像巨楠布幢
蓋翠蔓垂帷帳木靈不知名境幽或難狀我時馳征
輶犇走勅塵鞅獲此一段奇欣然愜微尚欲去興未
闌行行重回望末云宣和王寅題又鐫云丞相大觀
文沂國趙公以東川鎮鉞畫繡來歸弭節鄉郡爲父
老大夫士七日留乃歸內江之府第郡守楊樵執門
生禮敬餞於東巖一時賓客直秘閣新利路運副韓
炳新巴州趙伯總新恭州趙善詔新大甯監黃中前
昌州黃圖南新富順監黃裳制幙勾龍復成與俱語

出林杪慷慨與坐客盡醉公抗大節於天下而略位
貌於鄉黨於是氣凌八極矣樵請磨翠壁紀盛事共
託公爲不朽咸曰然淳熙壬寅二月十七日題 方
輿勝覽城西六里爲西巖山行不踰百步石壁夾道
如城如峽 又云城南五里爲南巖按卽重龍山也
巖峯盤屈隱若龍轉有亭閣梵刹跨其上江山城市
歷歷可觀 又云北巖去郡城半里等慈寺之東唐
盧并詩地靈無俗草巖靜有仙禽者此也郡志崖巔
古像半蝕苔蘚乳泉滴漑四時不絕蜀志補遺唐李
渭爲刺史有遊山詩云淮陽清淨理永嘉山水心刻

於等慈寺壁碑目云邵泰修北巖寺碑洗公石馬塔院碑滴水巖結界碑俱在本寺又云盧并及張公瑾北巖詩俱刻在龍水縣 寰宇記云龍水縣本資中地隋置在龍龜溪資陽西界依龜山隴爲城今縣三十里龍水鄉是也溪水屈曲蟠擁猶龍亦曰龍潭石壁有古刻云積雨新霽灑爽澄空寓異探幽人生行樂殊不易得縣令任聖用挈鄉人蒲君勉楊述美洎邑士張和叔飲於龍吟亭風味相投山樹巖石咸助意氣且移樽潭上醉歡歌笑見月迺歸乾道辛卯仲秋丁未述美書 范祖禹知龍水縣公餘紀興詩云

縣門倚巖谷終日對青峰初仕借爲宰讀書過三冬
亡機狎鷗鳥觀稼親老農訟庭可羅雀銅印苔蘚封
續古今記龍水縣有昭烈皇帝碑形如方柱頂如蓬壺文剝落三之一紹興丙寅孫原濟書 碑目云
龍川邑小而江水環秀距邑不三里曰靈巖又其傑出者端平乙未夏五月十有八日東川撫屬古渝李粹甫來酬供於此邑令眉山孫子山警曹巫山馮亭叔相與訪古靈湫載酒酌其上午暑正劇樹林陰翳巖氣襲人恍若此身在冰壺絕不知人間炎熱之苦竟日徜徉興殊未盡而景已晡矣遂拂翠巖而書以

紀歲月云前蜀馮銖靈巖秋月詩青松崖上紫雲生
巖下仙人約舊盟駐馬看碑驚化鶴暮雲回首萬家
城銖仕前蜀武成爲盤石令也 寰宇記云盤石在
州城北二里狀若盤陀後周以之名縣遂甯傅耆盤
石遷治記云珠江流其前丹神隱其北醮壇據其左
靈巖蟠其右劉光祖記云資號珠江以地之靈而產
瓊異相傳江中有夜光如燭方輿勝覽云丹神山在
盤石西北五里山之神靈值旱告之卽雨寰宇記之
丹山縣因此名也 按魏書保定二年資州盤石人
反殺郡守據險自守州軍不能制總管陸騰率軍討

擊破斬之而蠻子復反所在蠡起山路險阻難得掩
襲遂量山川形勢隨便開道蠻獠畏威承風請服所
開之路多得古銘竝是諸葛亮桓溫舊道是年鐵山
獠抄斷內江路使驛不通騰又進軍討之一日下其
三城招納降附者三萬戶今資陽之丹山鎮入其縣
界 圖經廢銀山縣在州東四十里山形如錠今銀
山鎮是其處古今集記云唐田游巖入蜀居於銀山
聚弟子歌雅詩以爲樂今山有雅歌臺石刻存志云
銀山候館因掘地得一小碣石乃黃山谷與門生戴
經弟綱尺牘云七二郎氣秀而有骨他日學問仕宦

皆當過人要須一佳士與遊養其忠厚之源此最爲
先務涪翁書贈戴六六七二秀才伯仲志云鎮之杜
家溝池水一泓清冷澄澈下卽龍泉洞也天將雨則
雲生竅穴霧瀾空谷前有石柱殿相傳龍出毀殿止
存二柱崖上鐫二龍土人懼其飛動摧去兩角山谷
曾遊此碑目云龍泉洞壁刻有淳熙丁未三月九日
何少虛少明從成都張無咎來汲深晤坐因訪舊題
數丁亥仲春六日字書與當時人物磨去已六七廿
年間幾風雨矣少虛且老有倦遊之歎方爲涪翁釣
磯之行益起丘壑之念故山猿鶴其能忘情哉又有

王齊賢李若水王簡熊九能濯凡塵步武而去
寫韻樓記資州古碑有祝融氏祝誦氏之號學齋帖
云資州掘地得漢碑有伏羲倉頡初造工業畫卦結
繩以理海內等語碑目云隋勅改羅漢院碑在法靈
院唐開元棲神山略記在洗鉢池前刺史房渙文崇
壽觀碑天寶二年建立宗書額御史中丞宋渾文已
磨滅裴晉公自贊在靈虛院左僕射裴瞻墓在盤石
縣北五里有世譜碑記藏於寶靈院馬端臨通考云
資州以新絳帖十卷刻石予家多有之前有目錄元
刻麻石上續搨者不逮舊所得本適勁已上皆不可

攷

內江縣

華陽國志江陽郡漢安縣郡東五百里土地雖迫山水特美好宜蠶桑有鹽井魚池以百數家家有焉一郡豐沃 水經注云雒水又逕漢安縣謂之綿水口又寰宇記云周天和中於資中地置漢安戍在水濱尋改爲中江縣隋開皇避先諱改爲內江仍徙治於漢安故城卽今縣也勝覽云中江水經盤石縣自十字水流入縣界又云內江有水深百丈實羣川總會之所矣晉郭璞城讖云山行依舊合水去復還來沈

約宋書云中江爲內水涪江爲外水按志中江源出汶山自灌口分支經懷口入簡州歷資江而下爲中江經三堆山下西折而東至縣復東折而南至棹木鎮又南折而西至黃市市距三堆十五里一水周環九十餘里而縣當其中故曰中江江去城不百武與城內桂湖相通以盈縮清濁知之也按湖在西北街宋黃思莊大書二字于岸石上旁植桂樹影可婆娑云 碑目云漢永建五年陳君爲漢安長失其名有陳君德政碑在獠井壩層崖之腹字雖磨滅然尙可攷又有漢永建五年漢安修棧道記俱在內江縣

本志云宋紹興末於內江縣置安夷軍董昌齡時爲令移徙新市平縣基得小碣一片刻詩云戰馬向風嘶荒雞隔水啼終日隨征旆何時罷鼓鞶 志云城東半里東林寺紹興中建有石佛按卽東津寺也范祖禹資州路東津寺詩云山行無晨暮日暝崖谷昏哀猿落客淚永路驚旅魂憑陵高山巔俯視大江奔迴環島嶼合縈轉洲渚屯行雲赴炎天飛鳥下蜀門地遐怪物聚寺古深殿存憶昔李氏末煙塵暗中原奸雄競草竊割據窮海根干戈百年後見此敗屋垣我來屬清秋登覽無俗喧山深虎豹歸水靜蛟鼉騫

臨風獨笑叱浩蕩欲飛翻自註云寺有石佛殿唐乾甯元年建 志云城南银杏舖江邊有放生碑欸爲宋都護校尉周仲亨立有寶光洞壁上鐫雲塞浴溪口金波光明久十字紹興進士邑人閻執中書又云银杏舖之陰江所遶也渡江對岸爲葛仙山相傳吳郡葛孝先曾棲其上今有巨人跡編戶葛仙里之名本此 志云治南二十里有高峰山瀕江有洞曰會真中刻大士羅漢甚古唐大姓閻氏所闢者洞幽邃時或撫掌聲若鳴蟬中多斷碣 志又云城西二里化龍山麓舊縣址也有長生觀凌風龕及冷然洞咸

涪中郢有朱真人者棲其中修煉有吐納之術其冷然洞記略曰予落迹安夷有長生池丹臺冷然洞青眼不逢揭籃而去因有客迹安夷尋達者無緣寄語共乘風之句也咸涪癸酉九月五日記又留題化龍山云郭外郊西柳已芽東流注目浩無涯江明白白紅紅樹春在三三兩兩家幾度來臨逢社燕一樽相對到昏雅此邦物色吟成畫高謝山中景致嘉刊碑在長生觀中正嘉之間山崩得古鏡及劍印石刻識云有宋之始化龍爲記日月相均永遠不墜亦疑朱仙所留又五里爲聖水寺寺有靈湫古碑紹興庚

申水觀禪師所剏邑尉蔡逸詩云二月春事半縣花無數開江頭連騎行江霧結紅埃下馬坐清蔭觀漁大江隈行行歷山寺金碧森樓臺拂石有唐碑字老生莓苔緬想古今事悠然一傷懷解榼醉泉石徬徨不忍迴辭徑下扁舟重開贖樽罍江煙暝山谷冰輪出崔嵬水面映金波流光浮玉杯蕩漾洲渚間往來恣徘徊一棹轉圓沙燈火來相催高歌賦厭厭會須期再來又云盡日苦征賦公餘來放懷霽雲生怪石宿雨溜懸崖鳥倦晨猶伏僧眠午未齋高人莫相笑仙尉亦吾儕又云城西廿餘里三堆山尖峰插漢

高閣憑空有古石像士人多遊焉昔耕者於山掘得小銅版上鐫詩云塵世不我留身寄白雲浮若問真遊處三山與十洲不知爲何代物志云西北十五里有華萼山有寺臨江巖上鐫滙瀾有斐四字唐范崇凱書方輿勝覽華萼山距內江縣十里許唐范金鄉讀書處按范崇凱玄宗時獻花萼樓賦爲天下第一鄉人榮之以賦名其山也其弟元凱亦能文時稱爲梧岡雙鳳李太白贈范金鄉詩云君子枉清盼不知東走迷離家未幾月絡繹鳴中閨桃李若不言攀花願成蹊那能吐芳惠好鳥相招攜我有結綠珍久

藏濁水泥時人棄此物乃與燕珉齊拂拭欲贈之申眉路無梯遼東慚白豕楚客羞山雞徒有獻芹心終流泣玉啼祇應自索莫留舌示山妻又范宰不買名絃歌對前楹爲邦默自化日覺冰壺清百里雞犬靜千廬機杼鳴浮人少蕩析愛客多逢迎遊子覩佳政曰之聽頌聲白集又有青山橫北郭白水遶東城此地一爲別孤蓬萬里征浮雲遊子意落日故人情揮手自茲去蕭蕭斑馬鳴一首志云亦送崇凱作也金鄉所居故址有臥碑鐫華萼樓賦剝落殆盡山之後灣有金鄉墓志云石笋山治東南七十里有石如

筭者三下圖上銳聳特漢表晴影沈江州長如滿
新月和上則明燭當天形家謂為邑之地輪以
為天關云

